


五禮通考

四四  
十十  
八七

内閣文庫			
番號	漢	1829	
冊數	160 ( 22 )		
函號	別	5	1









五禮通考卷四十七

淺草文庫

內廷供奉禮部右侍郎金匱秦蕙田編輯

兩淮都轉鹽運使德水盧見曾

李太保總督直隸右都御史桐城方觀承同訂

按察司副使元和宋宗元

參校

吉禮四十七

四望山川

史記封禪書昔三代之君皆在河洛之間

漢書注師古曰謂夏都安邑殷都朝歌周

陽故嵩高為中嶽而四嶽各如其方四瀆咸在山東至

秦稱帝都咸陽則五嶽四瀆皆并在東方自五帝以至

秦軼興軼衰名山大川或在諸侯或在天子其禮損益

世殊不可勝記師古曰代代殊異故不可盡記及秦并天下令祠官所常奉

天地名山大川鬼神可得而序也于是自殷以東索隱曰殺即嶠

山杜預云嶠在弘農澠池縣西南即今之二嶠山是也亦音豪名山五大川祠二曰太室太室嵩

高也恒山泰山會稽湘山索隱曰地理志湘山在長沙水曰濟曰淮索隱曰風俗通



云濟廟在臨邑淮廟在平氏也

春以脯酒為歲祠因泮凍

服虔曰解凍

秋涸凍

漢書注師古曰

涸讀與涸同涸凝也音十故反春則解之秋則凝之春秋左氏傳曰固陰涸寒禮記月令曰孟冬行春令則凍閉不密

冬賽禱祠

索隱曰賽音先

代反謂報神福也

其牲用牛犢各一牢具圭幣各異自華以西名

山七名川四曰華山薄山薄山者襄山也

漢書注師古曰說者云薄山在河東

一曰在潼關北十餘里而此志云自華以西者則今闕鄉之南山連延西山並得華山之名

岳山岐山吳山鴻冢瀆

山瀆山蜀之岷山也

漢書注師古曰周禮職方氏雍州其山曰岳爾雅亦云河西曰岳說者咸云岳即吳岳也今志有岳

又有吳山則吳岳非一山之名但未詳岳之所在耳徐廣云岳山在武功據地理志武功但有垂山無岳山也岐山即在今之岐山縣其山兩岐俗呼為箭括嶺吳

山在今隴州吳山縣鴻冢釋在下岷山在滿氏道

水曰河祠臨晉

漢書注師古曰即今之同州朝邑縣界

沔祠漢

中 漢書注師古曰沔漢水之上名也漢中今梁州是也沔音彌善反

湫淵祠朝那

蘇林曰秋淵在安定朝那縣方四十里停水不

流冬夏不增減不生草木湫音將蓼反漢書注師古曰此水今在涇州界清澈可愛不容穢濁或喧汚輒興雲雨土俗亢旱每于此求之相傳云龍之所居也而天下山川隈曲亦往往

有之湫音子由反

江水祀蜀

正義曰括地志云江瀆祠在益州成都縣南八里秦并天下江水祠蜀

亦春秋

泮涸禱賽如東方名山川而牲牛犢牢具圭幣各異而

四大冢鴻岐吳嶽皆有嘗禾

孟康曰以新穀祭

陳寶節來祠 服虔曰陳寶神

應節來也

其河加有嘗醪此皆在雍州之域近天子之都故加

車一乘駟駒四灞漑長水灃澇涇渭皆非大川呂近咸

陽盡得比山川祠而無諸加

韋昭曰無車駟之屬

汧洛二淵鳴澤蒲

山嶽嶭山之屬為小山川亦皆歲禱賽泮涸祠禮不必

同

漢書郊祀志秦始皇即帝位三年東游海上行禮祠名

山川及八神諸此祠皆太祝常主以歲時奉祠之至如

它名山川諸神及八神之屬上過則祠去則已郡縣遠

方祠者民各自奉祠不領于天子之祝官祝官有秘祝

即有災祥輒祝祠移過于下

史記封禪書二世元年東巡碣石並海南歷太山至會

稽皆禮祀之

右秦祀山川



漢書高祖本紀二年夏六月令祠官祀天地四方上帝山川以時祀之

郊祀志高祖初悉召故秦祀官復置太祝太宰如其故儀禮下詔曰吾甚重祠而敬祭今山川之神當祠者各以時禮祠之如故後四歲天下已定置祠祀官女巫令河巫祠河于臨晉而南山巫祠南山秦中

文帝即位十三年下詔曰秘祝之官移過于下朕甚弗取其除之始名山大川在諸侯諸侯祝各自奉祠天子官不領及齊淮南國廢令太祝盡以歲時致禮如故明年廣增諸祀壇場珪幣河湫漢水玉加各二

文帝本紀十五年夏四月修名山大川嘗祀而絕者有司以歲時致禮

武帝本紀建元元年夏五月詔曰河海潤千里其令祠

官修山川之祠為歲事曲加禮

郊祀志武帝元狩元年濟北王上書獻泰山及其旁邑天子以它縣償之常山王有罪舉師古曰舉與遷同天子封其弟真定以續先王祀而以常山為郡然後五嶽皆在天子之邦

文獻通考馬氏曰案古者天子祭四望五嶽四瀆其大者也然王畿不過千里千里之外則皆諸侯之國所謂嶽瀆豈必在畿內而後祭之如舜都蒲坂而一歲巡五嶽俱有望秩之禮是也始皇雖併六國而禮典廢墜所祠祭山川皆因其遊觀所至處與封禪求仙則及之而其領之祠官以歲時致祭且雜以淫祀者大率多秦中山川也至漢則名山大川之在諸侯國者不領于天子之祠官必俟齊淮南常山之國廢及濟北王獻地而後舉五嶽之祭俱非古義也

武帝本紀元封元年春正月行幸緱氏詔曰朕用事華山至于中嶽親登嵩高御史乘屬在廟旁吏卒咸聞呼萬歲者三登禮罔不答其令祠官加增太室祠禁無伐其草木以山下戶三百為之奉邑名曰崇高獨給祠復亡所與



郊祀志元封元年春三月東幸緱氏禮登中嶽太室從官在山上聞若有言萬歲云問上上不言問下下不言迺令祠官加增太室祠

武帝本紀元封五年冬行南巡狩至于盛唐望祀虞舜于九嶷登灑天柱山自潯陽浮江薄樅陽而出遂北至琅琊並海所過禮祠其名山大川

郊祀志五年上巡南郡至江陵而東登禮灑之天柱山號曰南嶽師古曰灑廬江縣天柱山在焉武帝以天柱山為南嶽浮江自潯陽出樅陽過彭蠡禮其名山大川

武帝本紀天漢三年春三月幸北地祠常山瘞元玉郊祀志自封太山後十三歲而周遍于五嶽四瀆矣

宣帝神爵元年制詔太常夫江海百川之大者也今闕焉無祠其令祠官以禮為歲事師古曰言每歲常祠之以四時祠江海

雒水祈為天下豐年焉自是五嶽四瀆皆有常禮東嶽

泰山于博中嶽太室于嵩高南嶽灑山于灑西嶽華山

于華陰北嶽常山于上曲陽師古曰上曲陽常山郡之縣也河于臨晉師古曰馮翊之縣也

江于江都淮于平氏師古曰南陽之縣也濟于臨邑界中師古曰東郡之縣也

皆使者持節侍祠惟泰山與河歲五祠江水四餘皆一禱而三祠云

哀帝建平三年莽改祭禮大合樂祀四望祭山川四望蓋謂日月星海也三光高而不可得親海廣大無界限故其樂同山川地理也

風俗通五岳東方泰山詩云泰山巖巖魯邦所瞻尊曰岱宗岱者長也萬物之始陰陽交代雲觸石而出膚寸而合不崇朝而徧雨天下其唯泰山乎故為五岳之長岱宗廟在博縣西北三十里山虞長守之十



月日合凍臘月日涸凍正月日解凍皆太守自侍祠  
 若有穢疾代行事法七十萬五千三牲燔柴上福脯  
 三十胸縣次傳送京師四岳皆王同禮南方衡山一  
 名霍霍者萬物盛長垂枝布葉霍然而大廟在廬江  
 灑縣西方華山華者華也萬物滋然變華于西方也  
 廟在弘農華陰縣北方恒山恒者常也萬物伏藏于  
 北方有常也廟在中山上曲陽縣中央曰嵩高嵩者  
 高也詩云嵩高維嶽峻極于天廟在潁川陽城縣四  
 瀆河出燉煌塞外崑崙山發源注海易河圖聖人則  
 之禹貢九河既道詩曰河水洋洋廟在河南滎陽縣  
 河隄謁者掌四瀆禮祠與五岳同江出蜀郡湔流互  
 徼外嶠山入海詩云江漢陶陶禹貢江漢朝宗于海  
 廟在廣陵江都縣淮出南陽平氏桐栢大復山東南

入海禹貢海岱及淮淮沂其乂詩云淮水湯湯廟在  
 平氏縣濟出常山房子贊皇山東入海禹貢浮于汶  
 達于濟廟在東郡臨邑縣

後漢書明帝本紀永平六年冬十二月幸陽城遣使者  
 祀中岳

章帝本紀元和二年春二月詔曰今山川鬼神應典禮  
 者尚未咸秩其議增修羣祀以祈豐年丙辰東巡守辛  
 未幸太山柴告岱宗有黃鶴三十從西南來經祀壇上  
 東北過于宮屋翱翔升降進幸奉高

三年春正月丙申北巡守二月戊辰進幸中山遣使者  
 祀北岳出長城三月己卯進幸趙庚辰祀房山于靈壽  
 安帝本紀延光三年春二月辛卯幸太山柴告岱宗  
 祭祀志延光三年上東巡守至太山柴祭及祀汶上明



置四  
五禮通考卷四十四  
五  
堂如元和三年故事

右兩漢祀山川

三國魏志文帝本紀黃初二年六月初祀五嶽四瀆咸秩羣祀

晉書禮志二年禮五嶽四瀆瘞沈珪璧

六年七月帝以舟軍入淮九月壬戌遣使者沈璧于淮三國魏志明帝本紀太和四年八月辛巳行東巡遣使者以特牛祠中嶽

青龍元年夏五月詔諸郡國山川不在祀典者勿祠陳留王本紀咸熙元年春正月行幸長安使使者以璧幣祀華山

右三國魏祀山川

晉書禮志太始元年十二月詔曰昔聖帝明王修五岳

四瀆名山川澤各有定制所以報陰陽之功故也然以道莅天下者其鬼不神其神不傷人故祝史薦而無媿辭是以其人敬慎幽冥而淫祀不作末世信道不篤僭禮瀆神縱欲祈請曾不敬而遠之徒偷以求幸祆妄相煽舍正為邪故魏朝疾之其案舊禮具為之制使功著于人者必有其報而祆淫之鬼不亂其間隋書禮儀志建武元年令郡國有五岳者置宰祝二人及有四瀆若海應祠者皆以孟春仲冬祠之晉書明帝本紀太寧三年七月詔曰自中興以來五岳四瀆名山大川載在祀典應望秩者悉廢而未舉主者其依舊詳處

禮志穆帝升平中何琦備論五嶽祠曰唐虞之制天子五載一巡狩順時之方柴燎五嶽望于山川徧于



羣神故曰因名山升中于天所以昭告神祇饗報功德是以災厲不作而風雨寒暑以時降及三代年數雖殊而其禮不易五嶽視三公四瀆視諸侯著在經記所謂有其舉之莫敢廢也及秦漢都西京涇渭長水雖不在祀典以近咸陽故盡得比大川之祠而正立之祀可以闕哉自永嘉之亂神州傾覆茲事替矣唯灑音潛之天柱在王略之內也舊臺選百戶吏卒以奉其職中興之際未有官守廬江郡常遣太史兼假四時禱賽春釋寒而冬請冰咸和迄今又復墮替計今非典之祠可謂非一考其正名則淫昏之鬼推其糜費則百姓之蠹而山川大神更為簡闕良由頃國家多難日不暇給草建廢滯事有未遑今元愨徒對反已殲宜修舊典嶽瀆之域風教所被而神明裡祀未之

或甄崇明前典將候皇輿北旋稽古憲章大釐制度俎豆牲牢祝嘏大辭舊章靡記可令禮官作式歸諸誠簡以達明德馨香如斯而已其諸妖孽可粗依法令先去其甚俾邪正不黷時不見省

右晉祀山川

宋書世祖本紀大明七年春二月甲寅車駕巡南豫南兗二州丙辰詔曰江漢楚望咸秩周禋禮九嶷于盛唐祀蓬萊于渤海皆前載流訓列聖遺式霍山是曰南岳實維國鎮韞靈呈端肇光宋道朕駐蹕于野有事岐陽瞻睇風雲徘徊以想可遣使奠祭

禮志大明七年六月丙辰有司奏詔奠祭霍山未審應奉使何官用何牲饌進奠之日又用何器殿中郎邱景先議修祀川岳道光列代差秩珪璋義昭聯冊但業曠



中葉儀漏典文尋姬典事繼宗伯漢載持節侍祠血祭  
 靈沈經垂明範酒脯牢具悉有詳例又名山著珪幣之  
 異大冢有嘗禾之加山海祠霍山以太牢告玉此準酌  
 記傳其可言者也今皇風緬暘輝祀通岳愚謂宜使以  
 太常持節牲以太牢之具羞用酒脯時穀禮以赤璋纁  
 幣又鬯人之職凡山川四方用脤則盛酒當以蠡栝其  
 餘器用無所取說案郊望山瀆以質表誠器用陶匏藉  
 以茅席近可依準山川以兆宜為壇域參議景先議為  
 允令以兼太常持節奉使牲用太牢加以璋幣器用陶  
 匏時不復用脤宜同郊祀以爵獻凡肴饌種數一依社  
 祭為允詔可

右宋祀山川

隋書禮儀志梁令郡國有五嶽者置宰祀三人及有四

瀆若海應祠者皆以孟春仲冬祠之

右梁祀山川

北魏書禮志泰常三年立五岳四瀆廟于桑乾水之陰  
 春秋遣有司祭有牲及幣四瀆唯以牲牢準古望秩云  
 其餘山川及海若諸神在州郡者合三百二十四所每  
 歲十月遣祀官詣州鎮遍祀有水旱災厲則牧守各隨  
 其界內祈謁其祭皆用牲王畿內諸山川皆列祠次祭  
 若有水旱則禱之

太宗本紀泰常四年秋八月辛未東巡遣使祭恒岳

禮志四年八月幸代至雁門關望祀恒岳

八年正月南巡恒岳祀以太牢幸洛陽遣使以太牢祀  
 嵩高華岳還登太行五月至自洛陽諸所過山川羣祀  
 之



世祖本紀太延元年六月甲午詔守宰祭界內名山大川十二月癸卯遣使者以太牢祀北岳

禮志太延元年立廟于恒岳華岳嵩岳上各置侍祀幾十人歲時祈禱水旱其春秋泮涸遣官率刺史祭以牲牢有玉幣

太平真君十一年十一月世祖南征逕恒山祀以太牢浮河濟祀以少牢過岱宗祀以太牢

文成皇帝即位三年正月遣有司詣華岳修廟立碑數十人在山上聞虛中若音聲聲中稱萬歲云

和平元年正月帝東巡歷橋山祀黃帝幸遼西望祀醫無閭山遂緣海西南幸冀州北至中山過恒岳禮其神而返

二年帝南巡過石門遣使者用玉璧牲牢禮恒岳

皇興二年以青徐既平遣中書令兼太常高允奉玉幣祀于東岳

高祖本紀太和四年二月癸巳詔曰朕承乾緒君臨海內夙興昧旦如履薄冰今東作方興庶類萌動品物資生膏雨不降歲一不登百姓饑乏朕甚懼焉其勅天下祀山川羣神及能興雲雨者修飾祀堂薦以牲璧

十九年春正月己亥車駕濟淮夏四月己未行幸瑕丘遣使以太牢祀岱岳

禮志太和十九年帝南征正月車駕濟淮命太常致祭又詔祀岱岳

右北魏祀山川

北齊書宣帝本紀天保元年六月己亥詔分遣使人致祭于五岳四瀆



右北齊祀山川

文獻通考後周大將出征遣太祝以羊一祭所過名山大川

右後周祀山川

隋書禮儀志開皇十四年閏十月詔東鎮沂山南鎮會稽山北鎮醫無閭山在東夷中遙祀冀州鎮霍山並就山立祠東海于會稽縣界南海于南海鎮南並近海立祠及四瀆吳山並取側近巫一人主知灑掃並令多蒔松柏其霍山雩祀日遣使就焉

大學衍義補邱氏濬曰鄭元注周禮四望有五岳四鎮四瀆後世祀典止有五嶽四瀆而無四鎮至是始祀之而又以冀州霍山為中鎮是為五鎮

隋書高祖本紀開皇十五年春正月壬戌車駕次齊州

親問疾苦景寅旅三符山庚午上以歲早祀泰山以謝愆咎大赦天下三月己未至自東巡狩望祭五嶽海瀆六月辛丑詔名山大川未祀典者悉祀之

禮儀志十六年正月又詔北鎮于營州龍山立祠東鎮晉州霍山鎮若修造並准西鎮吳山造神廟

煬帝本紀大業四年八月辛酉親祀恒岳河北道郡守畢集

禮儀志大業中煬帝因幸晉陽遂祭恒嶽其禮頗採高祖拜岱宗儀增置二壇命道士女官數十人於壇中設醮十年幸東都過祀華嶽築場于廟側事乃不經蓋非有司之定禮也 隋制行幸所過名山大川則有司致祭岳瀆以太牢山川以少牢

右隋祀山川



唐書禮樂志唐制嶽鎮海瀆祭于其廟無廟則為之壇坎廣一丈四向為陛者海瀆之壇也嶽鎮海瀆以山尊實醞齊山林川澤以蜃尊實沈齊皆二嶽鎮海瀆以兩圭有邱幣如其方色嶽鎮海瀆山林川澤籩豆各二簋簠各一邱陵墳衍原隰籩豆各一簋簠各一四時祭五嶽四鎮四海四瀆為籩豆十簋二簠二俎三犢皆少牢

高祖本紀武德二年十月甲子祠華山 三年四月丙申祠華山

冊府元龜武德七年六月幸仁智宮以少牢祭宮所山川

文獻通考唐武德貞觀之制五嶽四鎮四海年別一祭各以五郊迎氣日祭之東嶽岱山祭于兗州東鎮沂山

祭于沂州東海于萊州東瀆大淮于唐州南嶽衡山于衡州南鎮會稽山于越州南海于廣州南瀆大江于益州中嶽嵩山于洛州西嶽華山于華州西鎮吳山于隴州西鎮及西瀆大河于同州北嶽恒山于定州北鎮醫無閭山于營州北海及北瀆大濟于洛州其牲皆用太牢禮官以當界都督刺史克

冊府元龜貞觀十九年征遼三月丁丑幸定州經北嶽帝自為文祭之

唐書武后本紀中宗嗣聖五年即武后垂拱四年七月丁巳改洛

水為永昌洛水封其神為顯聖侯加特進禁漁釣改嵩山為神嶽封其神為天中王太師使持節大都督

蕙田案山川之神加以人爵封號蓋始于此非禮之端肇之者則天也



翼  
文獻通考武后萬歲通天元年尊神嶽天中王為神嶽  
天中皇帝神龍元年復為天中王先天二年封華嶽為  
金天王

蕙田案古者四望山川之祭壇而不屋易以  
廟號非古也况復封之為王為帝尊號頻加  
頻改不益惑之甚乎

舊唐書元宗本紀開元四年二月以關中旱遣使祈雨  
于驪山應時澍雨以少牢致祭仍禁樵採

冊府元龜開元五年十二月戊寅詔曰國之大事在祀  
神之所歆惟敬潔誠而齋精意以享則可臻介福致休  
祥深慮有司未副厥旨所緣岳瀆等祭宜令禮官博士  
斟酌古今務加虔肅合于典禮即詳定奏聞  
八年三月勅頃歲未登水旱不節今春事方起農桑是

憂宜令太常長官分祭華岳温湯

十一年四月庚申勅曰河東冀方其鎮惟霍神為天吏  
山有岳靈在昔皇業初興肇蒙嘉祉今者省方旋軫重  
獲休徵同受三神之貺獨忘百邑之禮其霍山宜崇飭  
祠廟秩視諸侯蠲山下十戶以為灑掃晉州刺史春秋  
致祀

十二年十一月庚午幸東都勅有司所經名山大川精  
意致祭以酒脯時果用代牲牢丙寅至華州命刺史徐  
知仁與信安王禕勒石于華嶽祠南之通衢帝親製其  
文

文獻通考十三年封泰山神為天齊王禮秩加三公一  
等

冊府元龜開元十六年六月丁亥詔曰爰自首春有懋



時雨朕憂勤黎庶精禱靈祇遂蒙九元垂福百神效祉膏澤頻降嘉年繁育睠彼山川能興雲雨報功享德祀典存焉諸州所管名山大川宜令當處長官設祭務盡誠敬以詔典禮庚寅詔曰宗社垂祐陰陽順成甘澤應時庶物繁育祇奉靈慶寅畏載深宜令中書門下肅事昭報仍令所司奏聞

舊唐書元宗本紀開元十八年百僚及華州父老累表請上尊號并封西岳不允

冊府元龜開元十八年正月丁巳親迎氣于東郊禮畢詔凡海內五岳四瀆諸鎮名山大川及靈跡各令郡縣逐處設祭

開元二十年四月戊申命有司擇日就祭五嶽四瀆十一月庚申祀后土于雒上命有司陳禮帝質明而享是

日大赦制五岳四瀆名山大川各令致祭務竭誠敬

唐開元禮祭五岳四鎮四海四瀆儀四祭每座籩豆各十簋籩各二俎二諸嶽

鎮海瀆每年一祭各以五郊迎氣日祭之設祭州界已具歷代祀山川篇

前祭五日諸祭官各散齋三日致齋二日如別儀前

一日嶽令瀆令清掃內外又為瘞埴于壇壬地方深取

足容物海瀆則埴內為壇高丈四尺皆為陸贊禮者設初獻位于壇東南亞獻

終獻于初獻南少退俱西向北上設掌事者位于終獻

東南重行西面以北為上設贊唱等諸位于終獻西南

西向北上設獻官等望瘞位于瘞坎之東北西向祭海瀆無望瘞

位設祭官以下門外位于南門之外道東重行西向以

北為上祭器之數罇六籩十豆十簋二簋二俎三嶽瀆

令帥其屬詣壇東陞升設罇于壇上東南隅北向西上

尊皆加勺霽有坫以置爵設玉篚于罇坫之所設洗于南陞東南北向



壘水在洗東篚在洗西南肆篚實以中爵執罇壘洗篚者各位

于罇壘篚之後祭日未明烹牲于厨其牲各隨方色齊即以豆先取毛血置于饌所夙

興掌饌者實祭器牲體牛羊豕皆載右胖前脚三節節一段去下節載上肢胛二節又取正脊

脰脊橫脊短脅正脅代脅各二骨以並餘皆不設簋實黍稷簋實稻粱藜十實石

鹽乾魚棗栗榛菱芡鹿脯白餅黑餅豆十實韭菹醢醢菁菹鹿醢芹菹兔醢荀菹

魚醢脾菜菹豚胎若土無者各以其類充之凡祭官各服其服三品毳冕四品繡冕五品元冕六品以下爵弁若有二品以下

各依令嶽令瀆令帥其屬入詣壇東陞升設嶽神瀆神座于

壇上近北面南向席以莞又實罇壘及玉凡罇一實醴齊一實盎齊一實清酒

其元酒各實于上罇祭神之玉兩圭有邸祝版置于坫嶽令瀆令又以幣置于篚齋

郎以豆血皆設于饌所其幣長丈八尺各隨方色贊唱者先入就位祝與

執罇壘篚者入當壇南重行北面以西為上立定贊唱

者曰再拜祝以下俱再拜執罇者升自東陞立于罇所

執壘篚者各就位祝詣壇東陞升行掃除于上降行掃

除于下訖瀆則掃除各就位質明贊禮者引祭官以下俱

就門外位立定一刻須贊禮者曰再拜在位者皆再拜

贊禮者進初獻之左白有司謹具請行事退復位贊唱

者曰再拜在位者皆再拜祝跪取玉幣于篚興立于罇

所凡取物者皆跪俛伏而取以與奠物莫訖俛伏而後興掌饌者帥齋郎奉饌陳于東門之

外贊禮者引初獻詣壇升自南陞進神座前北向立祝

以玉幣東向進初獻受玉幣還罇所贊禮者引初獻進

北向跪奠于神座興少退北向再拜贊禮者引初獻降

還本位掌饌者引饌入升自南陞祝迎引于壇上設于

神座前掌饌者帥齋郎降自東階復位祝還罇所贊禮

者引初獻詣壘洗盥手洗爵升自南陞詣酒罇所執罇

者舉冪初獻酌醴齊贊禮者引初獻進詣神座前北向

跪奠爵興少退北向立祝持版進于神座之右東面跪

讀祝文曰維某年歲次月朔日子嗣天子某謹遣某官



某敢昭告于東嶽岱宗唯神贊養萬品作鎮一方式因

春始南嶽云夏始中嶽云季夏西嶽云秋始北嶽云冬始謹以玉幣犧齊粢盛庶品朝薦

于東嶽岱宗尚享 東瀆大淮云惟神源流深泌潛潤

溥洽阜成百穀流滌三川青春伊始用遵典秩 南瀆

大江云惟神總合大川朝宗巨海功昭潤化德表靈長

敬用夏首修其常典 西瀆大河云惟神上通靈漢光

啟圖書分導九枝旁潤千里素秋戒序用率典常 北

瀆大濟云惟神泉源清潔浸彼遐遠播通四氣作紀一

方元冬肇節聿修典制訖興初獻再拜祝進奠版于神

座還罇所祝以爵酌清酒進初獻之右西向立初獻再

拜受爵跪祭酒啐酒奠爵祝帥齋郎以俎進減神座前

胙肉前脚第二節共置一俎上以授初獻初獻受以授

齋郎初獻跪取爵遂飲卒爵祝進受爵復于坫初獻興

再拜贊禮者引初獻降復位于初獻飲福酒贊禮者引

亞獻詣罍洗盥手洗爵升自東陞詣罇所執罇者舉罇

亞獻酌盞齊贊禮者引亞獻詣神座前北面跪奠爵興

少退北向再拜祝以爵酌清酒進于亞獻之右西向立

亞獻再拜受爵跪祭酒遂飲卒爵祝受虛爵復于坫亞

獻興再拜贊者引亞獻降復位初亞獻將畢贊禮者引

終獻盥洗升獻飲福如亞獻之儀訖贊禮者引終獻降

復位祝進神座前徹豆還罇所贊唱者曰再拜非飲福

受胙者皆再拜贊禮者進初獻之左白請就望瘞位西

向立于獻官將拜嶽令進神座跪取幣齋郎以俎載牲

體黍稷飯詣瘞埴以饌物置于埴祭海瀆獻官拜訖瀆令及齋郎以幣血沈于瀆瀆令退就位

東西廂各二人寘土半埴贊者進初獻之左白禮畢遂

引初獻以下立祝與執罇罍篚罍者俱復執事位立定



贊唱者曰再拜訖遂出祝版燔于齋所

舊唐書元宗本紀開元二十二年春正月癸卯朔制岳瀆海鎮用牲牢餘並以酒脯充奠二月壬寅秦州地震命尚書左丞相蕭嵩往祭山川

冊府元龜開元二十二年六月詔曰春來多雨歲事有妨朕自誠祈靈祈降福以時開霽迄用登成永惟休徵敢忘昭報宜令高品官祭五岳四瀆其天下名山大川各令所在長官致祭務盡誠潔用申精意

二十三年正月乙亥詔五岳四瀆名山大川並令所在長官以禮致祭

二十五年十月戊申勅曰時和年豐神所福也精意備物祭之義也朕每為蒼生嘗祈稔歲微誠有感丕應乃彰今宗社降靈神祇効祉三時不害百穀用成使京坻

遍于天下和平之氣既無遠而不通禋祀之典亦有期而必報宜令兵部尚書兼中書令晉國公李林甫工部尚書同中書門下三品幽國公牛仙客即分祭郊廟社稷尚書左丞相裴耀卿祭中岳禮部尚書杜暹祭東岳御史大夫李適之祭西岳太子賓客王丘祭北岳國子祭酒張說祭南岳其四瀆四海四鎮及諸名山靈跡等各委所由州長官祭仍令所司即擇日開奏務修蠲潔之禮以致精明之德冀申誠懇如朕意焉

文獻通考開元時天台道士司馬承禎言今五岳神祠是山林之神也非正真之神也五岳皆有洞府有上清真人降任其職山川風雨陰陽氣序是所理焉冠冕服章佐從神仙皆有名數請別立齋祠之所上奇其說因勅五岳各置真君祠一所





蕙田案以五岳之神為真君始此方士之謬也

冊府元龜天寶元年正月丁未改元制曰前王重典在乎祭祀况屬惟新事宜昭告五岳四瀆名山大川諸靈跡並令所繇州縣致祭是日甲寅得靈符于尹喜臺西百官請崇徽號壬申詔曰神仙所緘造化同固爰初有待經韞櫝而多時潛應改元若符契之相合景福修介祇畏良深而羣官宗室抗疏于外元良諸子屢請于中逮夫緇黃兼彼耆老以至誠懇不已前後相仍願加天寶之名用益開元之號顧惟菲薄何以當之然則元貺在乎欽承人心難以稱拒順天從衆義叶至公敬依所請實用多愧斯蓋上元厚載爰自百神孚佑效靈通于睿祖幽贊惟新之歷克彰永代之祥宜遵祀典式陳昭

報宜差公卿擇日祭五岳四瀆其名山大川各令所在長官備禮陳祭務申誠敬副朕意焉十二月乙亥詔曰歲之豐儉雖繫于常數天之感應實在于精誠頃者案以陰陽求諸推步至于今歲不合有年朕所以齋心妙門懇其元德靈徵不遠不應乃彰果獲西成頗為善熟蓋至道儲祉惠于蒸人亦羣神叶贊錫以昭報詩不云乎無德不報宜令光祿卿嗣鄭王希言祭東岳太子詹事嗣許王瓘祭中岳太常卿韋縉祭北岳所司即擇日錄奏其四瀆及諸名山大川或遠近不同各委所繇郡長官便擇吉日致祭務崇豐潔以稱朕懷三載四月丙辰遣使分祀岳瀆詔曰務農勸穡雖用天道人和歲稔實賴休徵頃者春夏之交稍愆時雨收穫之際復屬秋霖慮害農功每祈孚佑遂得百神降福羣望效靈既不



五  
為災仍多美熟幽贊之德普洽于生人昭報之儀式遵  
于祀典宜令太子詹事嗣許王瓘祭東岳光祿卿嗣鄭  
王希言祭中岳宗正卿濮陽郡王徹祭西岳少府監李  
知柔祭南岳衛尉卿嗣吳王祗祭淮瀆光祿少卿彭果  
祭河瀆所司擇日錄奏其名山大川有路近處亦合便  
祭僻遠處委所繇長官備禮致祭務陳蠲潔以達精誠  
十一月壬申勅曰敬惟明神普存于祀典咸秩羣望式  
重于邦畿頃者分命使臣致誠岳瀆山川便近亦已有  
處分其闕輔之內屢有陳祈王者所都禮亦異數應關  
內名山大川各委所繇郡縣長官稍優于常禮致祭京  
兆府界宜委蕭照同與少尹分祭倍崇精潔以副誠祈  
舊唐書元宗本紀天寶五載春正月封中岳為中天王  
南岳為司天王北岳為安天王天下山水名稱或同義

且不經多因于里諺宜令所司各據圖籍改定

冊府元龜天寶五載正月乙亥詔曰五方定位岳鎮總  
其靈萬物阜成雲雨施其潤上帝攸敘寰區是仰且岱  
宗西華先已封崇其中岳等三方典禮所尊未齊名秩  
永言光被用叶靈心其中岳神宜封為中天王南岳神  
為司天王北岳神為安天王應須告祭仍令所司擇日  
聞奏  
舊唐書元宗本紀天寶六載正月詔五岳既已封王四  
瀆當昇公位封河瀆為靈源公濟瀆為清源公江瀆為  
廣源公淮瀆為長源公

蕙田案四瀆封公爵始此

冊府元龜天寶六載正月戊子詔曰四瀆五岳雖差秩  
序興雲播潤益同利物崇號所及錫命宜均其五岳既



已封王四瀆當昇公位遞從加等以答靈心其河瀆宜封靈源公濟瀆封清源公江瀆封廣源公淮瀆封長源公仍令所司擇日差使告祭併五岳及名山大川并令所在長官致祭

舊唐書元宗本紀天寶七載十二月改會昌山為昭應山封山神為元德公仍立祠宇

冊府元龜天寶八載六月詔曰九州之鎮實著禮經三代之典必崇望秩事既屬于報功義有符于錫命其九州鎮山除入諸岳外宜並封公仍各置祠守者量更增修儲慶發祥當申昭報宜令所在長官各陳祭祀名山大川亦量事致祭九月命宗正卿褒郡信王璆祭西岳太僕少卿兼單于安北副大都護張齊邱祭北海蜀郡長史鮮于仲通祭江瀆太子詹事李旭祭北岳尚書右

丞李通遷祭河瀆詔曰朕肅恭明祀祈福上元冀敷佑于黎蒸將昭報于靈應頃蠻夷款附萬里廓清稼穡豐穰羣方樂業豈惟菲德以致元和寶賴神休永綏景貺思崇望秩用展虔誠宜令宗正卿褒信郡王璆等即分往五岳四瀆及四海致祭所經道次者名山大川亦便致祭務令精意以稱朕懷

蕙田案九鎮封公號始此

天寶九載四月詔曰五材並用時表上靈八水分流實稱美利京師與壤秦甸王畿灞澹通于涇渭滂滴匯于澧瀉蓄洩雷雨滋育稼穡雖惠澤已及于蒸民而虔誠猶闕于祀典聿崇精享庶達明神其涇渭灞澹等八水宜令左庶子韋述取今月二十九日一時備禮致祭務陳蠲潔稱朕意焉



五十三  
舊唐書元宗本紀天寶十載正月癸丑分遣嗣吳王祇  
等十三人祭岳鎮海瀆

冊府元龜天寶十載正月甲子制曰岳瀆山川蘊靈毓  
粹雲雨之澤利及生人春秋之義存乎祀典况正其運  
序式遵咸秩其五岳四瀆及諸鎮山宜令專使分往致  
祭其名山大川及諸靈跡先有廟者各令郡長官逐便  
致祭是月丁未封東海為廣德王南海為廣利王西海  
為廣潤王北海為廣澤王二月己亥分遣嗣吳王祇祭  
東岳齊天王嗣魯王宇祭南岳司天王秘書監崔秀祭  
中岳中天王國子祭酒班景倩祭西岳金天王宗正少  
卿李成裕祭北岳安天王衛尉少卿李澣祭江瀆廣源  
公京兆少尹韋嘗祭河瀆靈源公太子左諭德柳傑祭  
淮瀆長源公河南少尹豆盧回祭濟瀆清源公嗣道王

鍊祭沂山東安公江東道採訪使吳郡太守趙居貞祭  
會稽山永興公大理少卿李禎祭吳岳山成德公潁王  
府長史甘守默祭霍山應靈公范陽郡司馬畢悅祭醫  
巫閭山廣寧公並取三月十七日庚子一時致祭申命  
太子中允李隨祭東海儀王府長史張九章祭南海太  
子中允柳奕祭西海太子洗馬李隨榮祭北海加王位  
且行冊禮也四月辛巳制曰王者臨馭萬國莫不尊五  
岳至于迎氣致祭必在辨方正位朕丕冒眷命肅事嚴  
禮庶有合于乾坤用永垂于典實加以厚德載物莫先  
于土推誠導氣必叶于時在歷數之有徵諒國家之所  
感含弘廣大利用豐功隨王雖布于四方歸本且闕于  
中位朕式明統緒用答元符爰創新儀再修墜典頃者  
每祝黃帝乃就南郊義實有乖禮亦非便稽諸體式理



固不然宜于皇城內西南就坤地改置黃帝壇朕當親祠以昭誠敬仍令中書門下與禮官更審參詳奏聞

〔文獻通考〕七載八載十載皆以歲豐遣官分祭嶽瀆

冊府元龜天寶十二載二月制五岳四瀆及名山大川并靈跡之處各委郡縣長官致祭其祠宇頽毀者量事修葺

十四載八月辛卯制曰書云咸秩羣望詩曰懷柔百神永惟明徵豈忘昭報今秋稼穡頗勝常年實賴靈祇福臻稔歲其五岳四瀆所在山川及得道昇仙靈跡之處宜委郡縣長官至秋後各令醮祭務崇嚴潔式展誠享是月癸未詔曰朕永念蒸人祈穀上帝而陰陽式序風雨不愆今獲稼穡阜成允賴神明幽贊也頃者虔心精享已申昭告其五岳四瀆及天下諸郡山川近令秋後

展祭收穫既就農畝事隙報功咸秩抑推其時宜令所在郡縣長官即擇良辰以崇明祀

舊唐書禮儀志至德二年春帝在鳳翔改汧陽郡吳山為西岳增秩以祈靈助

冊府元龜上元元年閏四月己卯御明鳳門大赦改元詔曰自古明王聖帝名山大川並委州縣長吏擇日致祭

文獻通考肅宗上元二年改封華山為太山華陰縣為太陰縣

冊府元龜廣德二年二月詔五岳四瀆名山大川宜令所管致祭三月丙午勅曰三代之初皆有神降監其德也天寶啟之恭惟王業之初師及霍邑堅城未下大將阻兵連雨積旬糧儲不給有白衣父老忽詣軍門稱霍



山之神謁大唐皇帝云東南取路八日雨止助帝破敵盡如其言巖巖霍山九州之鎮興雲致雨功已洽于生人親道輔德力更宣于王室朕纘承大寶膺受鴻休朕嚮之間誠明可接永言幽贊茲謂有孚惟天命神據我斯意宜令禮儀使判官司封員外郎薛頊即往霍山致祭正詞以薦稱朕意焉

永泰元年正月癸巳改元制曰書稱成秩詩美懷柔仰惟衆靈念茲多祐其五岳四瀆名山大川宜令所管牧宰精誠致祭

大歷元年十一月甲子日長至御含元殿大赦改元制曰五岳四瀆名山大川祀典攸存神理昭著宜以禮致祭

五年六月詔曰五岳四瀆名山大川神明所居風雨是

主宜委中書門下分使致祭以達精誠

唐書歸崇敬傳大歷八年遣祀衡山未至而哥舒晃亂廣州監察御史憚之請望祀而還崇敬正色曰君命豈有畏耶遂往

文獻通考德宗貞元二年詔太常卿裴郁等十人各就方鎮祭岳瀆等舊禮皆因郊祀望而祭之天寶中始有遣使祈福之祠非禮之正也

冊府元龜貞元四年五月初復御署祭嶽鎮海瀆祝版文獻通考太常卿董晉奏五嶽四瀆伏準開元禮每年各以五郊迎氣日祭之其祝版並合御署自上元元年中祠小祠一切權停自後因循不請御署其祝版欲至饗祭日所司準程先進取御署附驛祭遣勅旨宜依仍所司每至時先奏附中使送往



冊府元龜順宗以貞元二十一年正月即位四月冊皇太子詔五嶽四瀆名山大川委所在長吏量加祭祀憲宗元和七年十月庚戌制冊皇太子五岳四瀆名山大川委所在長吏量加祭祀

文宗太和八年二月庚寅以疾瘳大赦詔曰百靈所佑獲遂痊和虔奉神休敢忘昭報其五岳四瀆名山大川各委所在長吏致祭仍加豐潔以副精誠

九年六月封雞翁山為侯先是翁造為興元節度使初往漢中遇大雨平地水尺餘不可進禱雞翁山疾風驅雲即時清霽及是帝憶聞其事會造為御史大夫入見得詳言當時靈貺明日下詔封之

文獻通考文宗開成二年四月十一日勅每聞京師舊說以為終南山興雲即必有雨若晴霽雖密雲佗至竟

不沾濡况茲山北面闕庭日當顧矚修其望祀寵數宜及今聞都無祠宇巖谷湫却在命祀終南山未備禮秩湫為山屬捨大從細深有闕于興雲致雨之祀也宜令中書門下且差官設奠宣告致禮便令擇立廟處所回日以聞命有司即時建立其年九月勅終南山宜封為廣惠公準四鎮例以本府都督刺史充獻官每年一祭以季夏土王日祭之

僖宗乾寧五年勅封少華山為佑順侯昭宗天佑二年勅封洞庭湖君為利涉侯青草湖君為安流侯

右唐祀山川

冊府元龜後唐愍帝應順元年閏正月詔曰朕猥以冲人獲膺大寶賴神祇之贊助顯天地之休禎夷夏駿奔



式符于睽命聲教綿遠虔荷于炳靈德薄承祧憂深馭  
 朽克奉治平之道諒繇冥助之功集是殊祥敢不寅畏  
 賴陰陽之行運致時雨以應期稼穡順成得歲功而叶  
 望咸臻上瑞普泰兆民宜令三京諸道州府界內名山  
 大川祠廟有益于民者以時精虔祭祀稱朕意焉  
 清泰元年五月壬申詔曰吳嶽成德公昨遇享期克申  
 幽贊宜加王號以表神功可進封靈應王其祀享官屬  
 仍舊同五嶽擇日冊命初帝在鳳翔將有沈闕之釁遣  
 房曷祀之有應至是欲加封爵下有司檢討奏曰天寶  
 十載正月封吳山為成德公與沂山會稽醫無閭同制  
 封公至德二年十二月改吳山為嶽祠享官屬視五嶽  
 今國家以靈應告祥宜示殊等故有是命至二年四月  
 庚午授冊于少府監烏昭達往吳山祠封靈應王

右後唐祀山川

冊府元龜後晉高祖天福二年三月詔巡幸汴州中書  
 奏車駕經過河南府河陽鄭州汴州管界所有名山大  
 川去路十里內者伏請下本州府各排比祗候車駕過  
 日以酒醑醢祭告從之五月湖南馬希範奏青草等四  
 廟各乞進封勅青草廟安流侯宜進封廣利公洞庭廟  
 利涉侯進封靈濟公磊石廟昭靈侯進封威顯公黃陵  
 二妃廟舊封懿節廟改封昭烈廟八月詔曰負固者天  
 地不容為逆者神人共怒永惟躬饗實有感通昨出師  
 之時將帥虔禱頗聞陰佑成此戰功唐衛國公宜封靈  
 顯王其餘鄭州并汜水管內神祠宜令長吏差官點簡  
 如有墮損處便委量事修葺貴申嚴飭以合陰功五嶽  
 承天四瀆紀地自正當陽之位未伸望秩之儀宜令差



官徧往告祭兼下逐州府量事修崇所有近廟山林仍  
宜禁斷樵牧十月丙戌命使祠五嶽四瀆

遼史太宗本紀會同三年冬十月庚申晉遣使貢布及

請親祠南嶽從之

案遼會同三年即晉天福五年

冊府元龜天福六年詔曰嶽鎮司方海瀆紀地載諸祀  
典咸福蒸民將保豐穰宜申虔敬俾加崇飾以奉神明  
其嶽鎮海瀆廟宇等宜令各修葺仍禁樵蘇

七年二月敕唐州湖陽縣蓼山神祠宜賜名為蓼山顯  
聖之神仍下本州修葺廟宇初元襄州安從進作逆舉  
軍北來東京教坊使充南面先鋒都監陳思讓進軍南  
行與從進相遇接蓼山列障俗以蓼與了字同音傳為  
不祥遂祈戰勝奏立廟額從進既敗行營都部署高行  
周以狀奏聞因有是勅

右後晉祀山川

冊府元龜後周太祖廣順二年五月親征兗州遣翰林  
學士竇儀祭東嶽廟

玉海周世宗顯德四年止祭沂山其諸鎮不祭

右後周祀山川

宋史太祖本紀乾德元年三月戊寅克復郎州湖南平  
夏四月乙酉遣使祭南嶽繼令有司製諸嶽神衣冠劍  
履遣使易之

玉海乾德六年詔祭四鎮准開元禮七月十日復南嶽  
四瀆常祭八月修霍山祠

圖書編宋初緣舊制祭東嶽泰山于兗州西嶽華山于  
華州北嶽恒山于定州中嶽嵩山于河南府  
文獻通考乾德六年有司言祠官所奉止四嶽令案祭



典請祭南嶽于衡州東鎮沂山于沂州南鎮會稽山于越州西鎮吳山于隴州中鎮霍山于晉州東海于萊州南海于廣州西海河瀆並於河中府北海濟瀆並於孟州淮瀆于唐州其江瀆準顯德五年勅祭于揚州揚子江口今請復祭于成都府北鎮醫無閭山在營州界未行祭享從之

其後望祭北鎮于定州北嶽祠

宋史太祖本紀開寶四年二月廣南平六月癸酉遣使祀南海

禮志廣南平遣司農少卿李繼芳祭南海除去劉鋹所封偽號及宮名易以一品服又命李昉盧多遜王祐扈蒙等分撰嶽瀆祠及歷代帝王碑遣翰林待詔孫崇望等分詣諸廟書于石

文獻通考開寶五年詔自今嶽瀆并東海南海廟各以

本縣令兼廟令尉兼廟丞專掌祀事常加案視務于蠲潔仍籍其廟宇祭器之數受代日交以相付本州長吏每月一詣廟察舉縣近廟者遷治所就之

宋史禮志開寶六年遣使奉衣冠劍履送西鎮吳嶽廟太祖本紀開寶九年秋七月丁亥命修五嶽四瀆祠廟玉海太宗太平興國四年六月八日平太原還次定州遣使祀北嶽

宋史禮志太宗太平興國八年河決滑州遣樞密直學士張齊賢詣白馬津以一太牢沈祠加璧自是九河決溢修塞皆致祭

玉海淳化二年二月秘書監李至請五郊迎氣祭其方嶽鎮海瀆北鎮于北嶽望祭八月十三日禮官言顯德中祭江瀆于揚請如故事祭于益



宋史禮志秘書監李至言案五郊迎氣之日皆祭逐方  
嶽鎮海瀆自兵亂後有不在封域者遂闕其祭國家克  
復四方間雖奉詔特祭未著常祀望遵舊禮就迎氣日  
各祭于所隸之州長吏以次爲獻官其後立春日祀東  
嶽岱山于兗州東鎮沂山于沂州東海于萊州淮瀆于  
唐州立夏日祀南嶽衡山于衡州南鎮會稽山于越州  
南海于廣州江瀆于成都府立秋日祀西嶽華山于華  
州西鎮吳山于隴州西海河瀆並於河中府西海就河  
瀆廟望祭立冬祀北嶽恒山北鎮醫無閭山並於定州  
北鎮就北嶽廟望祭北海濟瀆並於孟州北海就濟瀆  
廟望祭土王日祀中嶽嵩山于河南府中鎮霍山于晉  
州

玉海至道元年二月八日以旱祀五嶽故事御書祝版

學士言五嶽視三公稱名恐非古上曰唐德宗猶拜風  
雨朕爲民祈福無憚桑林之禱舊制豈可廢

宋史真宗本紀景德元年閏九月壬申江南旱遣使祀  
境內山川

文獻通考景德元年上封事者言案開元禮儀鑑云車  
駕行幸路次有名山大川去三十里內則祭之名臣十  
里內則祭之今朝陵有期緣州縣所祀山川祠宇名多  
僞俗望委禮官先檢詳事跡以聞可下太常禮院禮院  
言同開封府孟鄭州所供山川神祠除京城神祠舊係  
祀典者今約定祠宇請下逐州差官以禮致祭從之  
玉海景德三年七月以汴口復通祭河瀆十二月己卯  
詔澶州于河南置河瀆廟初帝幸澶淵大河不冰虜若  
見陰兵助戰故立祠



置  
文獻通考真宗景德三年令澶州置河瀆廟上幸大名  
也禱之有應及元年駐蹕澶淵戎騎在郊河流不冰故  
立祠春秋致祭

宋史真宗本紀景德四年二月辛卯車駕發西京甲午  
次鄭州遣使祀中嶽

禮志景德四年二月次西京遣告汾陰中嶽太行河洛  
啟母少姨廟東還奏告如常儀

真宗本紀大中祥符二年四月河北旱遣使祀北嶽五  
月陝西旱遣使禱西嶽河瀆諸祠三年八月旱洪潤州  
屢火遣使祀境內山川九月華州言父老二千餘人請  
幸西嶽

四年二月壬子出潼關渡渭河遣近臣祀西嶽乙丑加  
號西嶽五月乙未加上五嶽帝號作奉神述九月向敏

中等為五嶽奉冊使冬十月戊申御朝元殿發五嶽冊  
禮志真宗封禪畢加號泰山為仁聖天齊王遣職方郎  
中沈維宗致告又封威雄將軍為炳靈公通泉廟為靈  
派侯亭山神廟為廣禪侯嶧山神廟為靈巖侯各遣官  
致告詔泰山四面七里禁樵採給近山二十戶以奉神  
祠社首徂徠山並禁樵採車駕次澶州祭河瀆廟詔進  
號顯聖靈源公遣右諫議大夫薛映詣河中府比部員  
外郎丁顧言詣潭州祭告祕書丞董溫其言漢以霍山  
為南嶽望令壽州長吏春秋致祭禮官言雖前漢嘗以  
霍山為南嶽緣今嶽廟已在衡山難于改制其霍山如  
遇水旱祈求及非時準別勅致祭即委州縣奉行詔封  
江州馬當上水府福善安江王太平州采石中水府順  
聖平江王潤州金山下水府昭信泰江王及祀汾陰命



陳堯叟祭西海曹利用祭汾河車駕至潼關遣官祀西  
嶽及河瀆並用太牢備三獻禮庚午親謁華陰西嶽廟  
羣臣陪位廟垣內外列黃麾仗遣官分奠廟內諸神加  
號嶽神爲順聖金天王還至河中親謁莫河瀆廟及西  
海望祭壇五月乙未加上東嶽曰天齊仁聖帝南嶽曰  
司天昭聖帝西嶽曰金天順聖帝北嶽曰安天元聖帝  
中嶽曰中天崇聖帝命翰林禮官詳定儀注及冕服制  
度崇飾神像之禮其玉冊制如宗廟謚冊帝自作奉神  
述備紀崇奉意俾撰冊文有司設五嶽冊使一品鹵簿  
及授冊黃麾仗載冊輅袞冕輿于乾元門外各依方所  
羣臣朝服序班仗衛如會儀改服袞冕御乾元殿中書  
侍郎引五嶽玉冊尚衣奉袞冕升殿上爲之興奉冊使  
副班于香案前侍中宣制曰今加上五嶽帝號遣卿等

持節奉冊展禮咸承制再拜奉冊使以次升自東階受  
冊御座前降西階副使受袞冕輿于丹墀隨冊使降立  
丹墀西玉冊發至于朝元門外帝復坐冊使奉冊升輅  
鼓吹振作而行東嶽北嶽冊次于瑞聖園南嶽冊次于  
玉津園西嶽中嶽冊次于瓊林苑及廟內外列黃麾仗  
設登歌奉冊于車奉袞冕于輿使副袴褶騎從遣官三  
十員前導及門奉置幄次以州長吏以下克祀官致祭  
畢奉玉冊袞冕置殿內又加上五嶽帝后號東曰淑明  
南曰景明西曰肅明北曰靖明中曰正明遣官祭告詔  
嶽瀆四海諸廟遇設醮除青詞外增正神位祝文又改  
唐州上源桐栢廟爲淮瀆長源公加守護者帝自制五  
嶽醮告文遣使醮告即建壇之地構亭立石柱刻文其  
上



文獻通考十一月車駕過澶州幸河濱廟酌奠進號河濱曰顯聖靈源公遣官往河東府澶州祭告二年八月秘書丞董溫其上言漢以霍山為南嶽望令壽州長吏春秋致祭詔禮官與崇文院檢討詳定上奏曰案爾雅云江南衡山注云衡山南嶽又霍山為南嶽注云即天柱山潛水所出此即非特霍山為南嶽舜五月南巡周之王制皆以衡山為南嶽惟漢武帝以衡山遼遠取讖緯之說而祭灑霍至隋復以衡山為嶽况奉祀已久國家疆宇負廣難于改制其霍山如有所請及特致祭即委州縣奉行從之

陳氏淳曰泰山曰天齊仁聖帝在唐為天齊王至本朝以東方主生加仁聖二字封帝帝只一上帝而已安有山而謂之帝今立廟儼然人形貌垂旒端冕衣裳而坐又立后殿于其後不知又是何山可以當其配而為夫婦耶據泰山魯封內惟魯公可以祭今隔一江一淮與南方地脉絕不相干涉而在在州縣皆立東嶽行祠亦失于講明之故

邱氏濬曰有此天地即有此山川有此山川即有所以主之者是則所謂神也世俗乃以三月二十八日為嶽神初度之辰嗚呼自天一生水凝而為山其所以凝而成形也亦有時日即此無稽之甚也甚者惑于釋氏地獄之說謂人死其魂皆必經嶽祠考掠而有二十四案之像其說尤為不經乞下有司屏除毋俾得以惑世欺民

宋史樂志大中祥符五嶽加帝號祭告八首

迎神靜安 鍾石 既作俎豆在前雲旗飛揚神光肅

然當駕飈歛來乎育圓言備縟禮享茲吉蠲

冊入門正安 節彼喬嶽神明之府秩秩威儀肅肅

靈宇懿號克崇庶物咸覩帝籍升名式綏九土

酌獻東嶽嘉安 節彼岱宗有嚴廟貌惟辟奉天依

神設教帝典焜煌嘉薦普淖至靈格思殊祥是效

南嶽 作鎮炎夏畜茲靈光敷與萬物既阜既昌爰

刻溫玉式薦徽章昭嘏神意福熙穰穰

西嶽 瞻言太華奠方作鎮典冊是膺等威以峻上



公奉儀祀宮薦信介祉萬邦永配坤順

北嶽 仰止靈嶽鎮于朔方增崇懿號度越彝章祇

薦嘉樂式陳令芳永資純佑國祚蕃昌

中嶽 巖巖神嶽作鎮中央肅奉徽冊尊名孔章聿

降飈駕載獻蘭觴熙事允洽寶祚彌昌

送神靜安 祇薦鴻名寅威明祀有楚之儀如在之

祭奠獻既終禮容克備神鑒孔昭福禧來暨

天安殿冊封五嶽帝一首

冊出入正安 名嶽奠方帝儀克舉吉日惟良九賓

咸旅溫玉縷文纁裳正宁禮備樂成篤神之祐

真宗本紀 大中祥符五年八月己未作五嶽觀

玉海 五年二月命晁迥等撰五嶽碑 六年正月辛亥

修淮瀆廟九月辛卯修南海廟 七年十月十九日上

親製東嶽醮告文 八年三月十四日製五嶽醮告文

刊石于廟

宋史禮志 天禧四年從靈臺郎皇甫融請凡修河致祭

增龍神及尾宿天江天紀天社等諸星在天河內者凡

五十位

仁宗本紀 景祐四年六月乙亥杭州江潮壞堤遣使致

祭

文獻通考 仁宗康定二年增封海瀆逐處遣官致祭東

海為淵聖廣德王南海為洪聖廣利王西海為通聖廣

潤王北海為冲聖廣澤王江瀆為廣源王河瀆為靈源

王淮瀆為長源王濟瀆為清源王

宋史禮志 康定二年三月以黃河水勢甚淺致分流入

汴未能通濟遣使祭河瀆及靈津廟又澶州曹村埽方



開減水直河而水自流通遣使祭謝  
 文獻通考慶歷二年儂智高反圍廣州數有風雨遂遁  
 乃詔益封南海神為洪聖廣利昭順王  
 宋史仁宗本紀慶歷三年夏四月丙辰以春夏不雨遣  
 使祠禱于嶽瀆

禮志皇祐四年以靈臺郎王大明言汴口祭河兼祀箕  
 斗奎與東井天津天江咸池積水天淵天潢水位水府  
 四瀆九坎天船王良羅堰等十七星在天河內者  
 皇祐五年以儂智高道益封南海洪聖廣利招順王

蕙田案禮志與文獻通考年次不同必有一  
 誤

仁宗本紀嘉祐元年春正月帝不豫遣諸州長吏禱于  
 嶽瀆諸祠

王海嘉祐六年閏八月辛卯修北嶽祠

宋史神宗本紀熙寧元年春正月庚辰遣使祭南嶽南  
 海告以南伐十一月乙亥以安南行營將士疾疫遣同  
 知太常禮院王存禱南嶽遣中使建祈福道場

文獻通考神宗元豐三年集賢校理陳侗言案周禮小  
 宗伯之職兆五帝于四郊四望四類亦如之鄭氏注四  
 望謂五嶽四瀆也四類日月星辰也今四郊有五帝及  
 日月星辰之壇而獨四望之壇不建或遇朝廷有祈焉  
 則設位皇地祇壇下甚非古制請依周禮建四望壇于  
 四郊以祭五嶽四鎮四瀆庶合于經詔下詳定禮文所  
 詳定所請以國朝祠令所載嶽鎮海瀆兆四望于四郊  
 岱山沂山東海大淮于東郊衡山會稽山南海大江嵩  
 山霍山大海于南郊華山吳山西海大河于西郊常山



醫無閭山北海大濟于北郊每方嶽鎮則共為一壇海  
瀆則共為一坎以五時迎氣日祭之皆用血祭瘞埋有  
事則請禱之又以四方山川各附于本方嶽鎮海瀆之  
下別為一壇一坎水旱則禱之其北郊從祀及諸州縣  
就祭如故詔每方嶽鎮共為一壇望祭餘從之

宋史樂志熙寧望祭嶽鎮海瀆十七首

東望迎神凝安 盛德惟木勾芒御神沂岱淮海厥  
功在民爰熙壇坎哀對庶神于以歆格靈貽具臻  
升降固安 紳鞞襜兮玉佩榮兮于我將事神燕喜  
兮帝命望祀敢有不共往返于位肅肅雍雍  
奠玉幣明安 祀以崇德幣則有儀肅我將事登降  
孔時精明純潔罔有弗祗史辭無愧神用來娛  
酌獻成安 肇茲東土含潤無疆維時發春嘉薦令

芳祭用蕤沈順性含藏不涸不童誕降祺祥  
送神迎安 神之至止熙壇為春神之將歸旂服振  
振歛兮迴颺宵兮旋雲佑于東方永施厥二  
南望迎神凝安 嵩嵇衡霍暨厥海江時維長養惠  
我南邦肆嚴牲幣神式來降以侑以妥百福是龐  
酌獻成安 景風應律朱鳥開辰肅肅明祀嘉邊列  
陳牲用牲物樂奏蕤賓克綏永福祐此下民  
送神凝安 鼓鐘云云歛管依依神既醉飽曰送言  
歸山有厚藏水有靈德物其永依往奠炎宅  
中望迎神凝安 維土作德維帝御行含養載育萬  
物以成有嚴祀典薦我德馨神其歆止永用億寧  
酌獻成安 高廣融結實維中央宣氣報功利彼一  
方坎壇以祀六樂鏘鏘靈其有喜酌以大璋



送神凝安 言旋其處以奠中域無替厥靈四方是  
則神永不息祀永不愆以享以報于萬斯年  
西望迎神凝安 品物順說時司金行于郊迎氣以  
望庶靈雅樂惟樂圭薦惟牲作民之祉永相厥成  
酌獻成安 西顛沆碭執矩司秋諏言協靈時祀孔  
修禮有薦獻爰視公侯秩而祭之百福是道  
送神凝安 我樂我神簋俎牲饗曰神之還西土是  
宮于蕃禽魚于衍草木富我藪隰滋我高陸  
北望迎神凝安 帝德乘坎時御閉藏爰潔牲醴兆  
茲北方海山攸宅神施無疆具享蠲吉降福孔穰  
酌獻成安 淒寒凝陰隕穉滌場百物順成黍稷馨  
香款于北郊爰因其方何以侑神薦此嘉觴  
送神凝安 維山及川奠宅幽方我度其靈降止靡

常肅肅坎壇既迎既將促樂徹俎是送是望

禮志吳山舊封成德公元豐八年封王

元祐元年十二月以華州鄭縣山推命太常博士顏復  
往祭西嶽

王海元符三年修東嶽廟命曾肇為碑為殿三曰嘉寧  
蕃祉儲佑

宋史禮志東海大觀四年加號助順廣德王

徽宗本紀政和三年八月戊寅封四鎮山為王

禮志沂山舊封東安公政和三年封王會稽舊封永興  
公政和封永濟王醫巫閭舊封廣寧公政和封王霍山  
舊封應聖公政和封應靈王

文獻通考徽宗政和三年議禮局上五禮新儀五方嶽  
鎮海瀆壇各高五尺周四十步四出陛兩壝每壝二十



五步壇飾依方色祭嶽鎮海瀆設位南向以西為上山  
川從祀西向以北為上諸嶽鎮海瀆年別一祭以祭五  
帝日祭之東嶽泰山于兗州界東鎮沂山于青州界東  
海于萊州界東瀆大淮于高唐州界南瀆衡山于潭州  
界南鎮會稽山于越州界南海于廣州界南瀆大江于  
益州界中嶽嵩山于河南府界中鎮霍山晉州界西嶽  
華州界西鎮吳山于隴州界西海西瀆大河于河中府  
界北嶽常山及遙祀北鎮醫無閭山于定州界北海大  
瀆大濟于孟州界太常寺言大中祥符中封五嶽為帝  
四海為王獨五鎮封爵尚仍唐舊元豐八年始封西鎮  
吳山為成德王而未及四鎮詔並封王  
玉海高宗建炎元年九月權太常少卿滕康請如虞望  
秩周時邁車駕巡幸祭所過名山大川詔望祭

宋史高宗本紀紹興七年五月命禮官舉嶽鎮海瀆之  
祀

文獻通考紹興七年太常博士黃積厚言百神之祀曠  
歲弗修如中祀未舉者嶽瀆海鎮中嶽中鎮是也望舉  
而行之從之

每歲以四立日季夏土王日設祭其禮料初依奏告  
例後比擬舊制用羊豕各一口邊十菱芡栗鹿脯榛  
實乾桃乾榛乾棗形鹽魚鱸簋二稻粱簋二黍稷鉶  
鼎三銅羹登二大羹脂盤一毛血豆十芹筍葵菁韭  
魚醢兔醢腸胃鹿醢醢俎八羊腥七體羊熟十一  
羊腥腸胃羊熟腸胃肺豕腥七體豕熟十一豕腥膚  
豕熟膚尊壘二十四實酒並同皇地祇

三十一年知樞密院事督視軍馬葉義問言寇逼江上



與鎮江建康太平諸郡纔隔一水先報敵謀開第二港  
河欲徑衝丹徒施工累日一夕大風沙漲截斷不得渡  
以爲水府陰祐所以致然乞詔禮官考其制乞依五嶽  
例峻加帝號令建康守臣擇地建廟其金山采石二水  
府乞增封遣官精潔祭告詔令禮部太常寺討論已而  
太常寺言江瀆已封廣源王止係二字欲特贈加六字  
作八字王擬昭靈孚應威烈廣源王令建康守臣擇爽  
塏之地建廟賜額曰佑德其乞峻加帝號一節恢復中  
原日別議封冊兼契勘廣源王本廟係在成都府今來  
所封廟額并增八字王令本廟一等稱呼從之  
孝宗乾道五年太常少卿林栗言國家駐蹕東南東海  
南海實在封域之內檢照國朝祀儀立春祭東海于萊  
州立夏祭南海于廣州其西北獨即方州行二時望祭

之禮自渡江以後惟南海廣利王廟歲時降御書祝文  
令廣州行禮并紹興七年加封至八字王爵如東海之  
祠但以萊州隔絕不曾令沿海官司致其時祭殊不知  
通泰明越溫台泉福皆東海分界也紹興辛巳虜入寇  
李寶等舟師大捷于膠西是時神靈助順則東海之神  
于國爲有功矣謹案東海祠隋祭于會稽縣界唐祭于  
萊州界本朝沿唐制萊州立祠元豐元年建廟于明州  
定海縣既成命知制誥鄧潤甫撰記二年加封淵聖之  
號崇寧二年本朝歲度道士一員大觀四年又加助順  
二字則東海之祠本朝累加崇奉皆在明州不必泥于  
萊州矣欲乞行下禮部參照南海已封禮例將李寶等  
昨來立功事跡顯著特封東海之神八字王爵自今後  
立春及大禮告謝乞依見令廣州祭南海禮例闕報所



屬請降香祝下明州排辦差官行禮詔從之

蕙田案國勢偏安不克振作徒以加封神號為望祐之舉所謂聽命于神也其可久乎

宋史樂志紹興祀嶽鎮海瀆四十三首

東方迎神凝安 帝奠九壺孰非我疆翳我東土山

川相望祀事孔明肅雍不忘畢莪濛鴻郁哉洋洋

初獻盥洗同安 青陽肇開祀事孔飭鬱人贊溉其

馨苾苾敬爾威儀亦孔之則神之格思無我有歎

奠玉幣明安 司歷告時惟孟之春爰舉時祀旅于

有神鼓鐘既設珪帛具陳阜蕃庶物以福我民

東嶽位酌獻成安 巖巖天齊自古在昔膚寸之雲

四方其澤惟時東作祀事乃飭惠我無疆恩霑動植

東鎮位 惟山有鎮雄于其方東孰為雄于河之疆

祀事有時爰舉舊章我望匪遙庶幾燕享

東海位 瀕洞鴻濛天與無極導納江漢節宣南北

順助其功善下維德我祀孔時以介景福

東瀆位 我祀伊何于彼長淮導源桐栢委注蓬萊

扞齊護楚宣威示懷豆籩列陳亦孔之偕

亞終獻酌獻四位並同 我祀孔肅神其安留容與裴回若

止若浮洽此重觴申以百羞無我數遺萬邦之休

送神凝安 蹇兮紛紛神實戾止以飲以食以享以

祀叻兮冥冥神亦歸止以醉以飽以錫爾祉

南方迎神凝安 朱明盛長我祀用飭厥祀伊何山

山咸秩如將見之繩繩齊栗神哉沛兮消搖來格

初獻盥洗升降同安 爰熙嘉壇揭虔忒祀鬱人沃

盥贊我裸事于降于登以作以止莫不肅雍告靈享



矣

奠玉幣明安 我祀我享儀物孔周一純斯舉二精  
聿修璞兮其溫絲兮其紆是薦潔蠲神兮安留  
南嶽位酌獻成安 神曰司天居南之衡位焉則帝  
于以奠方南訛秩事望禮有常庶幾嘉虞介福無疆  
南鎮位 維南有山于彼會稽作鎮在昔神則司之  
厥有舊典以祀以時百味惟旨靈其燕娛  
南海位 維水善下利物曰功逶迤百川誰歟朝宗  
蕩蕩大受于焉會同膺蕭列陳以答鴻濛  
南瀆位 四瀆之利經營中國南曰大江險兮天設  
維爾有神諭其廟食望秩孔時我心翼翼  
亞終獻酌獻 神之游兮洋洋對越澹乎容與盼饗  
斯答乃奏既備八音攸節重觴申陳百禮以洽

送神

曲同  
迎神

薦徹豆邊熙事備成靈兮將歸羽旄紛紜

飄其逝矣浮空籟雲悵然顧瞻有撫懷心

中央迎神凝安 天作高山屹然中峙經營厥宇萬

億咸遂火熙土王爰舉時祀繩繩宣延彷彿來止

初獻盥洗升降同安 思來感格肅雍不忘禮儀既

備濟濟踴踴潔蠲致敬往薦其方交若有承神兮孔

饗

奠玉幣明安 練日有望高靈來下何以告誠心惟

物假有筐斯實有寶斯籍于以奠之神光燭夜

中嶽位酌獻成安 與天齊極伊嵩之高顯靈効異

神休孔昭飭我祀事實俎鸞膺以侑旨酒其馨有椒

中鎮位 禹畫九州河內曰冀霍山崇崇作鎮積勢

我祀如何百末旨味承神燕娛諸神畢至



亞終獻酌獻 禮樂既成肅容有常奄 消搖申畢  
重觴仰臚所求降福滂洋師象山則以况皇章

送神迎神 虞至旦兮靈亦有喜蹇欲驤兮象與已轆

粥音送兮靈聿歸以長無極兮錫我以祉

西方迎神凝安 有岌斯安有涵斯洽聿相厥成允

祀是答爰飭迺奏迺奏既協於昭降止是尊是接

初獻盥洗升降同安 靡實不新靡陳不濯人之弗

蠲矧敢將酌載晞之悅載濡之勺洗儀告備陟降時

若

奠玉幣明安 彼林有屐彼澤有沈倚與西望弗菲

弗淫迺追斯邸迺慌斯尋印禮既卒是用是歆

西嶽位酌獻成安 屹削厥方風雲斯所陰邑有宮

恤恤侯侯清酤在尊靈脊在下于俎獻兮則莫我吐

西鎮位 維吳崇崇于汧之西瞻彼有隴赫赫不迷

克俾于嶽我酌俶齊于凡有旅眠公維躋

西海位 奄浸坤軸滋殖其濺而典斯稽有陞有墳

弗替時舉元竿斯酌胡先于河實委之會

西瀆位 自彼崐虛于以潛流念茲誕潤豈侯不猶

在昔中府暨海聿修迄既望止神保先貞

亞終獻 肅肅其乂既旨既溢迨其畢酌偏茲博碩

祀事既遂不敢諄射神武醉止我心斯懌

送神迎神 迺羞既徹迺奏及闋無餽斯俎式聽致謁

不蹇不蹶不沸不決厲魁其祛永庇有截

北方迎神凝安 我土綿綿孰匪疆里惟時幽都匪

日隃只滌哉良月朔風其同曷阻曷深其亦來降

初獻盥洗升降同安 壽宮輝煌聿將時祀續其昭



矣吉蠲以娛居乎昂昂行乎遂遂敬爾攸司展采錯事

莫玉幣明安 相予陰威厥功浩浩一歲之功何以爲報府有珪幣我其敢私肅肅孔懷予以將之

北嶽位酌獻成安 瞻彼芒芒曰北之常既高既厚迺紀迺綱薦鬯伊始靈示孔將元服鐵駕覽此下方

北鎮位 赫赫作鎮幽朔之垂兼福我民食哉其宜克配彼嶽有嚴等衰蠲我灌禮其敢不祇

北海位 八裔皆水此一會同沄沄天墟洞蕩洪濛至哉維坎不有斯功所秩伊何黃流在中

北瀆位 水星之精播液發靈不脅于河既介以清翼翼盥薦椒糝芬馨載止載留爰弭翠旌

亞終獻 俎豆紛披金石繁會侑以貳尊匪瀆匪怠

我儀既周我心孔戒愴兮容與彷彿如在

送神 曲同迎神 靈既醉飽禮斯徹兮靈亦樂康樂斯闋兮

雲征颺舉不可尼兮薦福錫祉曷有極兮

理宗本紀淳祐十二年十二月癸亥詔海神爲大祀春秋遣從臣奉命往祠奉常其條具典禮來上

樂志淳祐祭海神十六首

迎神延安宮一曲 堪輿之間最鉅惟瀛包乾括坤吐日滔星祀典載新禮樂孔明鑒吾嘉賴來燕來寧

角一曲 四溟廣矣八紘是紀我宅東南迴復萬里洪濤颺風安危所倚祀事特隆神其戾止

徵一曲 若稽有唐克致崇極祝號既升爰增祭式從享于郊神斯受職我祀肇新式祈陰隲

羽一曲 猗與祀禮四海會同靈之來沛鞭霆馭風



盼饜彷彿在位肅雍佑我烝民式徽神功

升降欽安 靈之來至垂慶陰陰靈之已至飭茲五

音壇殿聿嚴陟降孔欽靈宜安留鑒我德心

東海位奠玉幣德安 百川所歸天地之左瀕洞鴻

濛功高善下行都依依百祿是荷制幣嘉玉以佑以

安

南海位奠玉幣瀛安 祝融之位貴乎三神吞納江

漢廣大無垠長為委輸佑我黎民敬陳明享允鑒恭

勤

西海位奠玉幣潤安 蒲昌之澤派引天潢羲娥出

入浩渺微茫蓋高斯覆猶隔封疆我思六合肇正吉

昌

北海位奠玉幣瀚安 瀚海重潤地紀亦歸吞受百

瀆限制北陲一視同仁我心則怡嘉薦玉幣神其格  
思

捧俎豐安 昭格靈祝祀典肇升牲牲告充雕俎是

承薦虔効物省德惟馨靈其有喜萬宇肅澄

東海位奠酌獻熙安 滄溟之德東南具依熬波出

素國計攸資石臼却敵濟我王師神其享錫益畀燕

綏

南海位酌獻貴安 南溟浮天旁通百蠻風檣迅疾

琛舶來還民商永賴坐消寇姦薦茲嘉觴弭矣驚瀾

西海位酌獻類安 積流疏派被于流沙布潤施澤

功均邇遐我秩祀典四海一家祇薦令芳靈其享嘉

北海位酌獻溥安 備忽會同裴回安留牲肥酒香

晨事聿修惟德之涼曷奄九州帝命是祇多福是求



亞終獻饗安 邊豆有楚貳觴斯旅神其醉飽式燕  
 以序百靈祕怪蜿蜒飛舞錫我祺祥有永終古  
 送神成安 告靈享矣錫我嘉祚乾端坤倪開豁呈  
 露元雲聿收羣龍咸驚滅除凶菑六幕清豫

右宋祀山川

五禮通考卷第四十七

五禮通考卷第四十八

內廷供奉禮部右侍郎金匱秦蕙田編輯

兩淮都轉鹽運使德水盧見曾

參校

李喬總督隸右都史桐城方觀承同訂

按察司副使元和宋宗元

吉禮四十八

四望山川

遼史太祖本紀太祖七年十一月祠木葉山

禮志太祖幸幽州大悲閣遷白衣觀音像建廟木葉山  
 尊為家神于拜山儀過樹之後增詣菩薩堂儀一節然  
 後拜神非胡刺可汗之故也

太祖本紀天贊三年八月登阿里典壓得斯山以麋鹿  
 祭

王圻續通考太宗天顯四年三月望祀羣神

遼史太宗本紀天顯四年秋七月戊寅祠木葉山



王圻續通考會同二年十月晉遣使請親祀南嶽從之  
遼史穆宗本紀應歷十二年六月甲午祀木葉山及潢  
河

應歷十四年七月以酒脯祀黑山

景宗本紀保寧元年十一月甲辰朔行柴冊禮祠木葉  
山

聖宗本紀統和七年二月遣巫覡祭名山大川三月壬  
午朔遣使祭木葉山

十三年八月詔修山澤祠宇以時祀之

興宗本紀重熙十四年冬十月甲子望祀木葉山

禮志興宗先有事于菩薩堂及木葉山遼河神然後行  
拜山儀冠服節文多所變更後因以為常

右遼祀山川

金史世宗本紀大定四年六月甲子以雨足命有司祭  
謝嶽鎮海瀆于北郊定祭四嶽五瀆禮

禮志大定四年禮官言嶽鎮海瀆當以五郊迎氣日祭  
之詔依典禮以四至土旺日就本廟致祭其在他界者  
遙祀立春祭東嶽于泰安州東鎮于益都府東海于萊  
州東瀆大淮于唐州立夏望祭南嶽衡山南鎮會稽山  
于河南府南海南瀆大江于萊州季夏土旺日祭中嶽  
于河南府中鎮霍山于平陽府立秋祭西嶽華山于華  
州西鎮吳山于隴州望祭西海西瀆于河中府立冬祭  
北嶽恒山于定州北鎮醫無閭山于廣寧府望祭北海  
北瀆大濟于孟州其封爵並仍唐宋之舊  
王圻續通考七年或有言前代都長安及汴洛以太華  
等山列為五嶽今既都燕當別議五嶽名時太常寺官



或取嵩高疏周都豐鎬以吳嶽為西嶽范拱以為非是  
議略曰軒轅居上谷在恒山之西舜居蒲阪在華山之  
北以此言之未嘗據所都而改嶽祀也後遂不改

金史世宗本紀大定八年五月庚寅改旺國崖曰靜寧  
山曷里許東川曰金蓮川

禮志鎮安公舊名旺國崖太祖伐遼嘗駐蹕于此大定  
八年五月更名靜寧山後建廟

大定十二年有司言長白山在興王之地禮合尊崇議  
封爵建廟宇十二月禮部太常學士院奏奉勅旨封興  
國靈應王即其北山地建廟宇

大定十五年二月奏定長白山封冊儀物冠九旒服九  
章玉圭玉冊函香幣祝冊遣使副各一員詣會寧府行  
禮官散齋二日致齋一日所司于廟中陳設如儀廟門

外設玉冊袞冕幄次牙仗旗鼓從物等視一品儀禮用  
三獻祭如嶽鎮其冊文云皇帝若曰自兩儀剖判山嶽  
神秀各鍾于其分野國將興者天實作之對越神休必  
以祀事故肇基王迹有若岐陽望秩山川於稽虞典厥  
惟長白載我金德仰止其高實惟我舊邦之鎮混同流  
光源所從出秩秩幽幽有相之道列聖蕃衍熾昌迄于  
太祖神武徵應無敵于天下爰作神主肆予冲人紹休  
聖緒四海之內名山大川靡不咸秩矧王業所因瞻彼  
早麓可儉其禮服章爵號非位于公侯之上不足以稱  
焉今遣某官某持節備物冊命茲山之神為興國靈應  
王仍勅有司歲時奉祀於戲廟食之享亘萬億年惟金  
之禎與山無極豈不偉歟自是每歲降香命有司春秋  
二仲擇日致祭



昭應順濟聖后大定十七年都水監言陽武上埽黃河神聖后廟宜依唐仲春祭五龍祠故事

大定十九年有司言瀘溝河水勢泛決噬民田乞官為封冊神號禮官以祀典所不載難之已而特封安平侯建廟

二十一年冊封山陵地大房山神為保陵公冕八旒服七章圭冊香幣使副持節行禮並如冊長白山之儀其冊文云皇帝若曰古之建邦設都必有名山大川以為形勝我國既定鼎于燕西顧郊圻巍然大房秀拔混厚雲雨之所出萬物之所瞻祖宗陵寢于是焉依仰惟嶽鎮古有秩序皆載祀典矧茲大房禮可闕歟其爵號服章俾列于侯伯之上庶足以稱今遣某官某備物冊命神為保陵公申勅有司歲時奉祀其封域之內禁無得

樵採弋獵著為令是後遣使山陵行禮畢山陵官以一獻禮致奠

混同江大定二十五年有司言昔太祖征遼策馬徑渡江神助順靈應昭著宜修祠宇加賜封爵迺封神為興國應聖公致祭如長白山儀冊禮如保靈公故事其冊文云昔我太祖武元皇帝受天明命掃遼季荒第成師以出至于大江浩浩洪流不舟而濟雖穆滿渡江而鼇梁光武濟河而水冰自今觀之無足言矣執徐之歲四月孟夏朕時邁舊邦臨江永嘆仰藝祖之開基佳江神之效靈至止上都議所以尊崇之典蓋古者五嶽視三公四瀆視諸侯至有唐以來遂享帝王之尊稱非直後世彌文而崇德報功理亦有當然者矧茲江源出于長白經營帝鄉實相興運非錫以上公之號則無以昭答



五  
神休今遣某官某持節備物冊命神為興國應聖公申  
命有司歲時奉祀於戲嚴廟貌正封爵禮亦至矣惟神  
其衍靈長之德用輔我國家彌億年神亦享廟食于無  
窮豈不休哉

嘉蔭侯大定二十五年勅封上京護國林神為護國嘉  
蔭侯毳冕七旒服五章圭同信圭遣使詣廟以三獻禮  
祭告其祝文曰蔚彼長林實壯天邑廣袤百里惟神主  
之廟貌有嚴侯封是享歆時蠲潔相厥滋榮是後遇月  
七日上京幕官一員行香著為令

大定二十七年春正月尚書省言鄭州河陰縣聖后廟  
前代河水為患屢禱有應嘗加封號廟額今因禱祈河  
遂安流乞加褒贈上從其請特加號曰昭應順濟聖后  
廟曰靈德善利之廟每歲委本縣長官春秋致祭如令

瀘溝河神大定二十七年奉旨每歲委本縣長官春秋  
致祭如令

章宗本紀明昌四年十二月甲寅冊長白山之神為開  
天弘道聖帝

禮志明昌四年十月備袞冕玉冊儀物上御大安殿用  
黃麾立仗八百人行仗五百人復冊為開天弘道聖帝  
章宗本紀明昌六年九月甲申冊靜寧山神為鎮安公  
忽土白山神為瑞聖公十二月乙亥詔加五鎮四瀆王  
爵

禮志明昌六年八月以冕服玉冊冊靜寧山神為鎮安  
公冊文曰皇帝若曰古之明山咸在祀典軒皇之世神  
靈所奉者七千虞氏之世望秩每及于五載蓋惟有益  
于國是以必報其功逮乎後王申以徽冊至于嶽鎮之



晉九  
外或亦封爵之加故太白有神應之稱而終南有廣惠  
之號禮由義起事與時偕載籍所傳于今猶監朕修和  
有夏咸秩無文眷茲靜寧秀峙朔野縕澤布氣幽贊乎  
坤元導風出雲協符乎乾造一方之表萬物所瞻南直  
都畿北維障徼連延廣厚寶藏攸興盤固高明謬宮斯  
奠昔有遼嘗恃以富國迄大定更爲之錫名洪惟世宗  
功昭列聖亦越顯考德利生民爰即歲時駕言臨幸兵  
革不試遠人輯寧雨暘常調品彙蕃庶此上帝無疆之  
貺亦英靈有相之符比即輿情載修故事顧先皇駐蹕  
之地揖累世承平之風迺續遺休式甄神祐肆象德以  
畀號仍班台而闡儀宇象一新采章具舉今遣使某副  
某持節備物冊命神爲鎮安公仍勅歲時奉祀於戲容  
典焜燿精明感通惟永億年翊我昌運神其受職豈不

偉歟

瑞聖公即麻達葛山也章宗生于此世宗愛此山勢衍  
氣清故命章宗名之後更名胡土白山建廟明昌六年  
八月以袞服玉冊封山神爲瑞聖公建廟命撫州有司  
春秋二仲擇日致祭爲常其冊文曰皇帝若曰國家之  
興命歷攸屬天地元化惟時合符山川百神無不受職  
粹精薦瑞明聖繼生著丕應于殊禎啟昌期于幽贊哀  
對信猶之典咸修望秩之文嘉乃名山奠茲勝地下綿  
乾分上直樞靜盤析木之津達中原之氣廓除氛祲函  
毓太和仰惟光烈昭垂徽音如在即高明而清暑克靜  
壽以安仁周廬安寧厚澤浹洽朕祇循祖武順講時巡  
感美號以興懷佩聖謨而介福言念誕彌之初度抑由  
翊衛之効靈然猶祀秩無章神居不屋非所以盡報功



五言  
崇德之義副追始樂原之心爰飾名稱載新祠宇勒忱  
辭于貞琰涓良日于元龜彰服采以辨威潔廢縣而致  
祭闡揚茂實敷繹多儀今遣使某副某持節備物冊命  
神為瑞聖公仍勅有司歲時奉祀於戲尚其聰明歆此  
誠意孚休惟永亦莫不寧

王圻續通考料石岡祠 海陵嘗過此祠持杯筴禱曰  
使吾有天命當得吉卜投之吉又禱曰果如所卜他日  
當有報否則毀爾祠宇投之又吉及即位貞元元年十  
月封料石岡神為靈應侯

章宗明昌六年十二月詔加五嶽四瀆王爵

金史禮志明章間從沂山道士楊道全請封沂山為東  
安王吳山為成德王霍山為應靈王會稽山為永興王  
醫無閭山為廣寧王淮為長源王江為會源王河為顯

聖靈源王濟為清源王每歲遣使奉御署祝版奩薌乘  
驛詣所在率郡邑長貳官行事禮用三獻讀祝官一捧  
祝官二盥洗官二爵洗官二奉爵官一司尊彝一禮直  
官四以州府司吏充前三日應行事執事官散齋二日  
治事如故宿于正寢如常儀前二日有司設行事執事  
官次于廟門外掌廟者掃除廟之內外前一日有司牽  
牲詣祠所享官以下常服閱饌物視牲充膾享日丑前  
五刻執事者設祝版于神位之右置于坫及以血豆陳  
于饌所次設祭器皆藉以席掌饌者實之左十籩為三  
行以右為上實以乾棗乾棗形鹽魚鱮鹿脯榛實乾桃  
菱芡栗右十豆為三行以左為上實以芹菹筍菹韭菹  
菁菹葵菹魚醢兔醢豚拍鹿醢醢次設犧尊二象尊  
二在堂上東南隅北向西上犧尊在前實以法酒犧尊



五章  
初獻官酌象尊亞終獻酌又設太尊一山尊一在神位前設而不酌有司設燭于神位前洗二在東階之下直東雷北向壘在洗東加勺筐在洗西南肆實以巾執壘筐者位于其後又設揖位于廟門外初獻在西東向亞終及祝在東南向北上開瘞坎于廟內庭之壬地享日丑前五刻執事官各就次掌饌者帥其屬實饌具畢凡祭官各服其服與執事官行止皆贊者引點視陳設訖退就次引初獻以下詣廟南門外揖位立定贊禮者贊揖次引祝升堂就位立次引初獻詣盥洗位北向立搯笏盥手悅手執笏詣爵洗位北向立搯笏洗爵以爵授執事者執笏升堂詣酌罇所西向立執事者以爵授初獻初獻搯笏執爵執罇者舉罇執事者酌酒初獻以爵授執事者執笏詣神座前北向立搯笏跪執事者以爵

授初獻初獻執爵三祭酒奠爵訖執笏俛伏興少立次引祝詣神位前東向立搯笏跪讀祝訖執笏興退復位初獻再拜贊禮者引初獻復位次引亞獻酌獻並如初獻之儀次引終獻並如亞獻之儀贊者引初獻官詣神位前北向立執事者以爵酌清酒進初獻之右初獻跪祭酒啐酒奠爵執事者以俎進減神座前胙肉前脚第二節共置一俎上以授初獻初獻以授執事者初獻取爵遂飲卒爵執事者進受爵復于坵初獻興再拜贊者引初獻復位贊者曰已飲福受胙者不拜亞獻官以下皆再拜拜訖次引初獻以下就望瘞位以饌物進于坎東西廂各二人贊者曰可瘞寘土半坎又曰禮畢遂引初獻官以下出祝與執尊壘筐罇者俱復位立定贊者曰再拜再拜訖遂出祝版燔于齋所



宣宗本紀貞祐三年十一月壬申遣參知政事侯摯祭河神于宜村

王圻續通考哀帝天興三年正月冊柴潭神為護國靈應王

右金祀山川

元史世宗本紀中統二年秋七月乙丑遣使持香幣祀嶽瀆冬十月辛卯遣道士訾洞春代祀東海廣德王廟祭祀志嶽鎮海瀆代祀自中統二年始凡十有九處分五道後乃以東嶽東海東鎮北鎮為東道中嶽淮瀆濟瀆北海南嶽南海南鎮為南道北嶽西嶽后土河瀆中鎮西海西鎮江瀆為西道既而又以驛騎迂遠復為五道道遣使二人集賢院奏遣漢官翰林院奏遣蒙古官出璽書給驛以行中統初遣道士或副以漢官

世祖本紀至元三年秋七月丙午遣使祀五嶽四瀆

祭祀志至元三年夏四月定歲祀嶽鎮海瀆之制正月

東嶽鎮海瀆土旺日祀泰山于泰安州沂山于益都府

界立春日祀東海于萊州界大淮于唐州界三月南嶽

鎮海瀆立夏日遥祭衡山土旺日遥祭會稽山皆于河

南府界立夏日遥祭南海大江于萊州界六月中嶽鎮

土旺日祀嵩山于河南府界霍山于平陽府界七月西

嶽鎮海瀆土旺日祀華山于華州界吳山于隴縣界立

秋日遥祭西海大河于河中府界十月北嶽鎮海瀆土

旺日祀恒山于曲陽縣界醫無閭于遼陽廣寧路界立

冬日遥祭北海于登州界濟瀆于濟源縣祀官以所任

守土官為之既有江南乃罷遥祭

世祖本紀至元四年春正月癸丑勅封昔木土山為武



定山其神曰武定公泉為靈淵其神曰靈淵侯夏四月辛未遣使祀嶽瀆

十二年二月甲辰立河瀆等廟于河中解州洪洞趙城

庚午命怯薛丹察罕不花侍儀副使闕思義真人李德

和代祀嶽瀆

十三年五月乙未遣使代祀嶽瀆秋七月丙辰遣使持

香幣祠嶽瀆

十四年二月甲子遣使代祀嶽瀆五月乙卯命真人李

德和代祀濟瀆秋七月丁巳回水窩淵聖廣源王加封

善佑常山靈濟昭應王加封廣惠安邱電泉靈霈侯追

封靈霈公

十五年春正月賜湖州長興縣金沙泉名為瑞應泉金

沙泉不常出唐時用此水造紫筍茶進貢有司具牲幣

祭之始得水事訖輒涸宋末屢加浚治泉迄不出至是

中書省遣官致祭一夕水溢可溉田千畝安撫司以事

聞故賜今名八月制封泉州神女號護國明著靈惠協

正善慶顯濟天妃

祭祀志凡名山大川忠臣義士在祀典者所在有司主

之惟南海女神靈惠夫人至元中以護海運有奇應加

封天妃神號積至十字廟曰靈慈直沽平江周涇泉福

興化等處皆有廟

世祖本紀至元十六年五月丙子進封桑乾河神洪濟

公為顯應洪濟公

十七年二月遣使代祀嶽瀆十二月修桐柏山淮瀆祠

二十一年五月辛巳加封衛輝路小清河神曰洪濟威

惠王



二十二 年春正月甲申遣使代祀五嶽四瀆東海冬十月甲辰修南嶽廟

二十三年春正月壬午太陰犯軒轅太民遣使代祀嶽瀆東海

二十六年春正月辛丑遣使代祀嶽瀆東南海

二十七年春正月丁巳遣使代祀嶽瀆海神九月辛亥修東海廣德王廟

二十八年饑二月己卯遣官持香詣中嶽南海淮瀆致禱丁酉詔加嶽瀆四海封號各遣官詣祠致告

王圻續通考至元二十八年正月帝謂中書省臣言曰五嶽四瀆祠事朕宜親往道遠不可大臣如卿等又有國務宜遣重臣代朕祠之漢人選名儒及道士習祀事者其禮物則每處歲祀銀香盒一重二十五兩五嶽組

金幡二鈔五百貫四瀆織金幡二鈔二百五十貫四海五鎮銷金幡二鈔二百五十貫至則守臣奉詔使行禮

皇帝登寶位遣官致祭降香幡盒如前禮惟各加銀五十兩五嶽各中統鈔五百貫四瀆四海五鎮各中統鈔二百五十貫或他有禱禮亦如之

是年春二月加上東嶽為齊天大生仁聖帝南嶽司天大化昭聖帝西嶽金天大利順聖帝北嶽安天大

貞元聖帝中嶽中天大寧崇聖帝加封江瀆為廣源順濟王河瀆靈源弘濟王淮瀆長源博濟王濟瀆清

源善濟王東海廣德靈會王南海廣利靈孚王西海廣潤靈通王北海廣澤靈祐王

時東平布衣趙天麟上策曰臣聞天子祭天地及天下之名山大川諸侯祭社稷及名山大川之在其地者大

五嶽通考卷四十一 四望山川



五經  
禮記卷之四十八  
夫祭五祀士祭宗廟庶人祭祖考於寢上得兼下下不得僭上皆有制以節之今國家稱秩元祀咸秩無文既有禮部及太常司侍儀司以備其節文又詔令所在官司歲時致祭五嶽四瀆名山大川歷代聖帝明王忠臣節士之載在祀典者皆其宜也竊見方今小民不安常典妄事神明其類甚多不可枚舉夫東嶽者太平天子告成之地東方藩侯當祀之山今乃有娼優戲謔之徒貨殖屠沽之子每年春季四方雲聚有不遠千里而來者有提挈全家而至者干越邦典滌瀆神明停廢產業耗損食貨亦已甚矣昔季氏魯國之上卿旅於泰山孔子猶欲其宰救之况小民之賤乎大人之教不以名器分之則將紊矣小民之心不以名器繩之則將恣矣况淫祀者事神之誠極寡希福之貪甚多且父慈子孝何

用焚香上安下順何須楮幣不然則雖竭天下之香繼爐而焚之罄天下之楮為幣而蕪之臣知其斷無益矣然而聖人立祀禮者報其當然之本行吾當然之義也伏望陛下申明前詔使天下郡縣官各祭名山大川聖帝明王忠臣節士之在其地者凡下民當祭之神如祖考及門庭戶竈等聽之凡非典所當祀而祀者禁之無令妄瀆凡祈神賽社漿酒藿肉飾立神像泥金鏤木者禁之無令妄費如是則非但巫風寢消抑亦富民一助

蕙田案山川之祀其來自古天子諸侯之秩祀本無與于小民自後世加封晉號非時淫祀一切皆邀福之心小民化之遂至如此趙天麟所奏切中時弊有益世教此風至今猶然不可禁止人心之惑非一朝一夕之故矣



元史世祖本紀至元二十九年二月遣使代祀嶽瀆四海

三十年正月丁亥遣使代祀嶽瀆東海

成宗本紀元貞二年二月遣使代祀嶽瀆

大德元年六月甲午諸王也里干遣使乘驛祀五嶽四瀆命追其驛券仍切責之

二年二月癸未詔諸王駙馬母擅祀嶽鎮海瀆三月壬

子詔加封東鎮沂山為元德東安王南鎮會稽山為昭

德順應王西鎮吳山為成德永靖王北鎮醫無閭山為

貞德廣寧王中鎮霍山為崇德應靈王勅有司歲時與嶽瀆同祀著為令式

四年遣使祠東嶽

武宗本紀至大元年三月遣使祀五嶽四瀆名山大川

仁宗本紀延祐四年冬十月遣御史大夫伯忽參知政事王桂祭陝西嶽鎮名山

祭祀志南海女神靈惠夫人皇慶以來歲遣使齋香編

祭金幡一合銀一錠付平江官漕司及本府官用柔毛

酒醴便服行事祝文云維年月日皇帝特遣某官等致

祭于護國庇民廣濟福惠明著天妃

英宗本紀至治元年五月辛卯海漕糧至直沽遣使祀海神天妃

泰定帝本紀泰定元年二月加封廣德路祠山神張真

君曰普濟寧國路廣惠王曰福祐

王圻續通考泰定元年遣使代祀嶽瀆又以鹽官州海

水溢遣使祀海神



二年遣使代祀龍虎武當二山又遣使代祀嶽瀆名山  
大川

元史泰定帝本紀泰定三年三月乙巳朔帝以不雨遣  
使分祀五嶽四瀆名山大川及京城寺觀秋七月甲辰  
遣使祀海神天妃八月辛丑作天妃宮于海津鎮鹽官  
州大風海溢遣使祭海神十一月戊午加封廬陵江神  
曰顯應

四年秋七月乙丑遣使祀海神天妃閏九月甲戌命致  
祭五嶽四瀆名山大川冬十月甲辰改封建德路烏龍  
山神曰忠顯靈澤普祐孚惠王

致和元年春正月甲申遣使祀海神天妃加封幸淵龍  
神福應昭惠公三月甲申遣戶部尚書李家奴往鹽官  
祀海神仍集議修海岸夏四月甲寅改封蒙山神曰嘉

惠昭應王鹽池神曰靈富公洞庭廟神曰忠惠順利靈  
濟昭佑王

文宗本紀天歷元年九月壬戌遣使祭五嶽四瀆

二年冬十月己亥加封天妃為護國庇民廣濟福惠明  
著天妃賜廟額曰靈慈遣使致祭遣使代祀嶽瀆山川  
十一月戊午遣使代祀天妃

王圻續通考至順二年冬十月遣秘書太監王珪等代  
祀嶽鎮海瀆

三年遣使分祀嶽鎮海瀆

五年加北嶽之神為安天大貞元皇帝

順帝至元元年加封真定路滹沱河神為昭佑靈源侯  
元史順帝本紀至正二年春正月癸巳遣翰林學士三  
保等代祀五嶽四瀆



九年九月遣御史中丞李獻代祀河瀆

王圻續通考十年詔加封河瀆神爲靈源神祐弘濟王仍重建河瀆及西海神廟

元史順帝本紀十四年冬十月詔加海神爲輔國護聖庇民廣濟福惠明著天妃

二十一年十一月戊辰黃河自平陸三門磧下至孟津五百餘里皆清凡七日命秘書少監程徐祀之

右元祀山川

明會典國初建山川壇于天地壇之西正殿七間祭太歲風雲雷雨五嶽五鎮四海四瀆鍾山之神東西廡各十五間祭京畿山川春夏秋冬四季月將及都城隍之神壇西南有先農壇東有旗纛廟南有籍田

明史禮志嶽鎮海瀆山川之祀洪武二年太祖以嶽瀆

諸神合祭城南未有專祀又享祀之所屋而不壇非尊神之道禮官言宜以嶽鎮海瀆及天下山川城隍諸地祇合爲一壇與天神埒春秋專祀遂定祭日以清明霜降前期一日皇帝躬省牲至日服通天冠絳紗袍詣嶽鎮海瀆前行三獻禮山川城隍分獻官行禮是年命官十八人祭天下嶽鎮海瀆之神帝皮弁御奉天殿躬署御名以香祝授使者百官公服送至中書省使者奉以行黃金合貯香黃綺幡二白金二十五兩市祭物

春明夢餘錄洪武二年以嶽鎮海瀆山川諸神享祀之所未有壇壝非隆敬神祇之道命禮官考古制以聞禮官奏嶽鎮海瀆之祀虞舜以四仲月巡狩而祭四嶽東嶽泰山四嶽之宗也故文曰岱宗南嶽曰衡山西嶽曰華山北嶽曰恒山而未言五嶽王制曰天子祭天下名



山大川五嶽四瀆始有五嶽之稱蓋以中嶽嵩山並列又周官小宗伯兆四望于四郊鄭元謂四望爲四嶽四瀆四瀆者江河淮濟也四鎮者東曰沂山西曰吳山南曰會稽北曰醫無閭詩又曰巡狩而祀四嶽河海則又有四海之祭蓋天子方望之祀無所不通而嶽鎮海瀆在諸侯封內諸侯亦各以其方祀之秦罷封建嶽瀆皆領于祀官及漢復建諸侯則侯國各祀其封內山川天子無預焉武帝時諸侯或分或廢五嶽皆在天子之邦宣帝時嶽瀆始有使者持節祀之禮由魏及隋嶽鎮海瀆皆即其地立祠命有司致祭唐宋之制有命本界刺史縣令之祀有因郊祀而望祭之祀又有遣祭之祀元遣使祭嶽鎮海瀆分東西南北中爲五道其天下山川之祀虞書望于山川徧于羣神周頌曰懷柔百神周禮

小宗伯兆山川邱陵墳衍各因其方王制凡山川之小者其祭秩視伯子男劉向謂山川能生物出雲雨施潤澤品類以百數故視伯子男其在諸侯封內者諸侯又自祭之如楚祭睢漳晉祭惡池齊祭配林是也秦罷封建則皆領于祠官焉由漢唐以及宋元嶽鎮海瀆之外又有其餘山川之祀不獨嶽瀆也今國家開創之初嘗以嶽鎮海瀆及天下山川與太歲風雲雷雨城隍皆祀于城南享祀之所既非專祀又室而不壇非理所宜夫海嶽之神其氣本流通暢達無有限隔今宜以嶽鎮海瀆及天下山川與太歲風雲雷雨城隍合爲一壇春秋祀之詔可

明史禮志洪武二年建山川壇于正陽門外天地壇西合祀諸神凡設壇十九太歲春夏秋冬四季月將爲第



五音五  
五音五  
一次風雲雷雨次五嶽次五鎮次四海次四瀆次京都  
鍾山次江東次江西次湖廣次淮東淮西次浙東浙西  
福建次廣東廣西海南海北次山東山西河南河北次  
北平陝西次左江右江次安南高麗占城諸國山川次  
京都城隍次六纛大神旗纛大將五方旗神戰舡金鼓  
銃礮弓弩飛鎗飛石陣前陣後諸神皆躬自行禮先祭  
禮官奏祝文太歲以下至四海凡五壇稱臣者親署御  
名其鍾山諸神稱余者請令禮官代署帝曰朋友書牘  
尚親題姓名况神明乎遂加親署後又定驚蟄秋分後  
三日遣官祭山川壇諸神七年令春秋仲月上旬擇日  
以祭

明會典洪武三年正嶽鎮海瀆城隍諸神號合祀太歲  
月將風雲雷雨嶽鎮海瀆山川城隍旗纛諸神又令每  
歲用驚蟄秋分各後三日遣官祭山川壇諸神是日上  
皮弁服御奉天殿降香中嚴坐殿上獻官復命解嚴還  
宮 是年又合祭東嶽泰山于山川壇

明史禮志洪武三年詔定嶽鎮海瀆神號略曰爲治之  
道必本于禮今依古定制並去前代所封名號五嶽稱  
東嶽泰山之神南嶽衡山之神中嶽嵩山之神西嶽華  
山之神北嶽恒山之神五鎮稱東鎮沂山之神南鎮會  
稽山之神中鎮霍山之神西鎮吳山之神北鎮醫無閭  
山之神四海稱東海之神南海之神西海之神北海之  
神四瀆稱東瀆大淮之神南瀆大江之神西瀆大河之  
神北瀆大濟之神帝躬署名于祝文遣官以更定神號  
告祭

日知錄洪武三年六月癸亥詔曰五嶽五鎮四海四瀆



之封起自唐世崇名美號歷代有加在朕思之則有不  
 然夫嶽鎮海瀆皆高山廣水自天地開闢以至于今英  
 靈之氣萃而為神必皆受命于上帝幽微莫測豈國家  
 封號之所可加瀆禮不經莫此為甚至如忠臣烈士雖  
 可加以封號亦惟當時為宜夫禮所以明神人正名分  
 不可以僭差今宜依古定制凡嶽鎮海瀆並去其前代  
 所封名號止以山水本名稱其神郡縣城隍神號一體  
 改正歷代忠臣烈士亦依當時初封以為實號後世溢  
 美之稱皆與革去庶幾神人之際名正言順于禮為當  
 用稱朕以禮事神之意其東嶽祝文曰神有歷代之封  
 號予詳之再三畏不敢效可謂卓絕千古之見

邱氏濬曰我聖祖此詔可謂考諸三王而不謬質諸  
 鬼神而無疑百世以俟聖人而不惑一滌千古之謬

臣知上帝在天之靈必有以簡在于冥冥之中而山  
 川鬼神亦莫不各受其職矣

明史禮志其他山川之神洪武元年躬祀汴梁諸神仍  
 遣官祭境內山川二年以天下山川祔祭嶽瀆壇帝又  
 以安南高麗皆臣附其國內山川宜與中國同祭諭中  
 書及禮官考之安南之山二十一其江六其水六高麗  
 之山三其水四命著祀典設位以祭三年遣使往安南  
 高麗占城祀其國山川帝齋戒親為祝文仍遣官頒革  
 正山川神號詔于安南占城高麗六年琉球諸國已朝  
 貢祀其國山川八年禮部尚書牛諒言京都既罷祭天  
 下山川其外國山川亦非天子所當親祀中書及禮臣  
 請附祭各省從之廣西附祭安南占城真臘暹羅鎖里  
 廣東附祭三佛齊瓜哇福建附祭日本琉球渤泥遼東



附祭高麗陝西附祭甘肅朶甘烏斯藏京城不復祭又  
從禮官言各省山川居中南向外國山川東西向同壇  
共祀

明集禮專祀嶽鎮海瀆天下山川

國朝既於方邱以嶽鎮海瀆天下名山從祀復於春  
秋清明霜降日遣官專祀嶽鎮海瀆天下山川于國  
城之南至于外夷山川亦列祀典若國有祈禱則又  
遣使降香專祀于其本界之廟若夫山川之在王國  
則自以時致祭

瘞坎 嶽鎮海瀆祭畢其祝幣牲饌嶽鎮則瘞之于坎  
海瀆則沈之于水其國南羣祀壇則並置于瘞坎

祝版親祀祝文自署御名遣官代祀祝文稱嗣天子某  
謹遣臣某官姓名敢昭告于東嶽泰山之神唯神磅礴

英靈參贊化育位于東方為嶽之首及出膚寸之雲不  
崇朝而雨天下有滋稼苗民賴以生功被于世歷代帝  
王咸敦祀典或躬臨而奉祭或遣使以伸忱朕允膺天  
命肇造丕基禮宜親臨致祀今國治未周新附未撫或  
居以圖治或出而視師是用命使以表朕衷惟神鑒焉  
尚享西嶽曰惟神氣應金方靈鍾兌位奠於西極屹立  
巍巍長物養民功被于世歷代云云同前南嶽曰惟神祝  
融諸峯奠彼南服崇高峻極德配離明長物養民功被  
于世北嶽曰惟神鎮并臨代峙立朔方終始陰陽德著  
悠久養民阜物功被寰中中嶽曰惟神嵩高攸宅表此  
中區四嶽攸宗羣山環拱養民育物功被寰中東海曰  
惟神百川朝宗涵育深廣靈鍾坎德潤衍震宗滋物養  
民功被於世歷代云云同前西海曰惟神灝靈所鍾道里



遼邈坎德深廣行潤兌方滋物養民功被于世南海曰  
 惟神環茲粵壤物巨靈鍾坎德深大離明斯配潤物養  
 民功被于世北海曰惟神元冥攸司遐遠莫即鍾靈坎  
 德奠位陰方潤物養民功被于世江瀆曰惟神岷蜀發  
 源浩渺萬里朝宗於海坎德靈長潤物養民澤被于世  
 歷代云云同前河瀆曰惟神發源崑崙亘絡中土配精天  
 漢坎德靈長潤物養民澤被于世淮瀆曰惟神源深桐  
 柏演迤楚甸出雲致雨潤物養民坎德靈長澤被于世  
 濟瀆曰惟神沈浸覃懷功配三瀆流澄蕩濁潤物養民  
 坎德靈長澤被于世東鎮曰惟神鎮彼瑯琊羣山所仰  
 宣澤布氣毓秀鍾靈生物養民功被于世歷代云云同前  
 西鎮曰惟神作鎮汧陽羣山所仰宣澤布氣育秀鍾靈  
 生物養民功被于世南鎮曰惟神作鎮會稽羣山所仰

宣澤布氣育秀鍾靈阜物養民功被于世北鎮曰惟神  
 鎮彼平營羣山所仰宣澤布氣育秀鍾靈阜物養民功  
 被于世中鎮曰惟神鎮彼霍邑三晉所瞻育秀暢靈奠  
 茲中土生殖庶物功被寰宇洪武三年正月專遣使致  
 祭于外夷山川其安南祝文曰惟神磅礴深廣流峙西  
 南靈秀所鍾福庇一方使其國君世保境土當歷代中  
 國帝王之興即能慕義歸化得免兵戈靖安民庶神功  
 為大朕本布衣因四方雲擾廓清羣雄混一天下以承  
 正統皆賴天地神明而至于此自臨御以來海嶽鎮瀆  
 俱已致祭邇者安南奉表稱臣考之典禮天子于山川  
 之祀無所不通故特遣使以牲幣之祭往答神靈尚享  
 其高麗祝文曰高麗為國奠于海東山勢磅礴水德汪  
 洋實皆靈氣所鍾故能使境土安寧國君世享富貴尊



慕中國以保生民神功為大朕起自布衣今混一天下以承正統比者高麗奉表稱臣朕嘉其誠已封王爵考之古典天子于山川之祀無所不通是用遣使敬將牲帛修其祀事以答神靈惟神鑒之尚享其占城祝文曰惟神靈秀磅礴源流深廣以濟民物保安海邦使其國君世守境土尊附中國其功多矣朕起自布衣仰荷天地眷祐混一疆宇以承正統邇者占城奉表稱臣考之典禮天子于天下山川之祀無所不通故特遣使以牲幣之祭往答神靈惟神鑒之尚享五月降詔嶽鎮海瀆復遣使代祀其祝文曰惟洪武三年歲次庚戌六月戊午朔越二十二日乙卯某官臣某今蒙中書省點差欽賚祝文致祭于東嶽泰山之神皇帝制曰磅礴東海之西中國之東參穹靈秀生同天地形勢巍然古昔帝王

登之觀滄海察地利以安生民故祀曰泰山于敬則誠于禮則宜自唐始加神之封號歷代相因至今曩者元君失馭海內鼎沸生民塗炭余起布衣承上天后土之命百神陰佑削平暴亂正位稱尊職當奉天地享鬼神以依時統一人民法當式古今寰宇既清特修祀儀因神有歷代之封號予起寒微詳之再三畏不敢效蓋神與穹壤同始靈鎮東方其來不知歲月幾何神之所以靈人莫能測其職必受命于天后土為人君者何敢預焉予懼不敢加號特以東嶽泰山名其名依時祀神唯神鑒知尚享南嶽中嶽西嶽北嶽祝文並同其東鎮祝文曰屹立沂州作鎮東方生同天地形勢巍然古先帝王察地利以安民生故祀之曰沂山于敬則誠于禮則宜自唐始加神之封號歷代相因至今曩者元君失



馭海內鼎沸生民塗炭予起布衣承上天后土之命百神陰佑削平暴亂正位稱尊職當奉天地享鬼神以依時統一人民法當式古今寰宇既清特修祀儀因神有歷代之封號予起寒微詳之再三畏不敢效蓋神與穹壤同始靈鎮東方其來不知歲月幾何神之所以靈人莫能測其職必受命于上天后土為人君者何敢預焉予懼不敢加號特以東鎮沂山名其依時祀神惟神鑒知尚享其起句南鎮則曰屹立會稽作鎮南方中鎮則曰屹立霍州作鎮中央西鎮則曰屹立隴州作鎮西方北鎮則曰屹立營州作鎮北方餘並同東鎮其東海祝文曰生同天地浩瀚之勢既雄深淺之處莫測古昔人君名之曰海神而祀之于敬則誠于禮則宜自唐以及近代皆加以封號予因元君失馭四方鼎沸起自布衣承上

天后土之佑百神之助削平暴亂以主中國職當奉天地享鬼神以依時式古法以昭民今寰宇既清特修祀儀因神有歷代之封號予起寒微詳之再三畏不敢効蓋觀神之所以生與穹壤同立於世其來不知歲月幾何凡施為造化人莫可知其職必受命于上天后土為人君者何敢預焉予懼不敢加號特以東海名其依時祭祀神其鑒知尚享南海西海北海文並同其東瀆大淮祝文曰源始桐柏潔而東逝納諸川以歸海古者人君尊曰淮瀆之神未嘗加號于敬則誠于禮則宜自唐始加神之封號歷代相因至今曩者元君失馭海內鼎沸予起布衣承上天后土之命百神陰佑削平暴亂正位稱尊職當奉天地享鬼神以依時統一人民法宜式古今寰宇既清特修祀儀因神有歷代之封號予起寒微詳之再三

禮記通考卷第八 四望山川

三



畏不敢効蓋神與穹壤同始其來不知歲月幾何神之  
 所以靈人莫能知其造化必受命于上天后土為人君  
 者何敢預焉予懼不敢加號特以東瀆大淮名其名依  
 時祀神惟神鑒知尚享其南瀆則曰源于岷山生同天  
 地廣納諸川東逝于海古者人君尊曰江瀆之神餘文並同東鎮  
 其西瀆則曰源于崑崙其行也屈曲其激也有聲于山  
 不徙于平壤則流蕩洶湧莫測自有天地則有之古之  
 人君尊曰河瀆之神餘文並同東鎮其北瀆則曰源始王屋伏流  
 而出潔異衆水古者人君尊曰濟瀆之神餘文並同東鎮  
 代祀嶽鎮海瀆碑文 洪武二年春正月四日羣臣來  
 朝皇帝若曰朕自起義臨濠率服渡江宅於金陵每獲  
 城池必祭其境內山川于今十有五年罔敢或怠邇者  
 命將出師中原底定嶽鎮海瀆悉在封域朕託天地祖

宗之靈武功之成雖藉人力然山川之神嘿實相予自  
 古帝王之有天下莫不禮秩尊崇朕曷敢違于是親選  
 敦朴廉潔之臣賜以衣冠俾齊沐端竦以俟遂以十月  
 五日授祝幣而遣焉臣某承詔將事惟謹某月某日祭  
 于祠下威靈歆格祀事孔明礮石鐫文用垂悠久惟神  
 收藏萬類莫于東方西南北隨方改用典禮既崇綱維斯在尚期  
 陰陽以和風雨以時物不疵癘民庶乂安是我聖天子  
 之所望于神明者而亦神明助我邦家之靈驗也  
 代祀外夷山川碑文 洪武三年春正月三日癸巳皇  
 帝御奉天殿受羣臣朝乃言曰朕賴天地祖宗眷祐位  
 于臣民之上郊廟社稷以及嶽鎮海瀆之祭不敢不恭  
 邇者占城安南高麗並同遣使奉表稱臣朕已封其王為占城國  
 王安南高麗同則其國之境内山川既歸職方考諸古典天子



望祭雖無不通然未聞行實禮達其境者今當具牲幣遣朝天宮道士某人前往用答神靈禮部尚書崔亮欽承上旨惟謹乃諭臣某致其誠潔以俟于是上齋戒七日親為祝文至十日庚子上臨朝以香授臣某將命而行臣某以某月某日至其國設壇城南某月某日敬行祀事于某國某山及諸山之神某水及諸水之神禮用告成臣某聞帝王之勤民者必致敬于神欽惟皇上受天明命丕承正統四海內外悉皆臣屬思與普天之下共享昇平之治故遣臣某致祭于神神既歆格必能庇其國王世保境土使風雨以時年穀豐登民庶得以靖安庶昭聖天子一視同仁之意是用刻文于石以垂示永久臣某謹記某國王臣某陪臣某官某

祭器

合祭嶽鎮海瀆天下山川及遣使分祀每壇各

尊三籩八豆八簋二簋二登二州縣祀本境山川則尊二籩二豆二簋一簋一

玉幣

望祀用幣不用玉諸王同遣使奉祠嶽鎮海瀆

各降真香一炷沉香一合金香合一共一觔黃紵絲幡

一對幣帛一段長丈有八尺銀三十五兩其外夷山川

則高麗播用青安南占城播用紅餘並同嶽鎮海瀆

牲 合祭嶽鎮海瀆山川各用犢一羊一豕一遣使代

祀各廟並同州縣祭本境山川用羊一豕一

酒齊 合祭嶽鎮海瀆天下山川及遣使代祀犧尊實

醴齊象尊實沈齊山壘實事酒州縣祭本境山川則象

尊實緹齊壺尊實事酒

梁盛 合祭嶽鎮海瀆天下山川及遣使分祀並如宋

制其州縣祭本境山川簋實以稷簋實以粱



籩豆之實 合祭嶽鎮海瀆於國城之南及每歲遣使  
分祀各廟並籩實以石鹽魚鱠棗栗榛菱芡脯豆實以  
韭菹醢醢菁菹鹿醢芹菹兔醢筍菹魚醢州縣祭本境  
山川則籩實以栗脯豆實以葵菹鹿醢

樂 望祀用雅樂諸王祭本國山川則用大樂遣使代  
祀不用樂

祭服 遣官攝祀並用公服  
專祀地亦壇諸神樂章

迎神保和之曲 吉日良辰祀典式陳惟地之示百  
靈繽紛嶽鎮海瀆山川城隍內而中國外及四方濯  
濯厥靈昭鑒我心以候以迎來格來歆  
奠幣安和之曲 靈旗泣止有赫其威一念潛通幽  
明弗違有幣在篚物薄而微神兮安留尚其饗之

初獻中和之曲 神兮我留有薦必受享祀之初奠  
茲醴酒晨光初升祥徵應候何以侑觴樂陳雅奏  
亞獻肅和之曲 我祀維何奉茲犧牲爰酌醴齊貳  
觴載升洋洋如在式燕以寧庶表微衷交于神明  
終獻凝和之曲 執事有嚴品物斯祭黍稷非馨式  
將其意薦茲酒醴成我常祀神其顧歆永言樂只  
徹豆壽和之曲 春祈秋報率為我民我民之生賴  
于爾神維神祐之康寧是臻祭祀云畢神其樂歆  
送神豫和之曲 三獻禮終九成樂作神人以和既  
燕且樂雲車風馭靈光昭灼瞻望以思邈彼寥廓  
望瘞熙和之曲 俎豆既徹禮樂已終神之云還倏  
將焉從以望以瘞庶幾感通時和歲豐維神之功  
降香遣官祀嶽鎮海瀆天下山川儀注 時日春以清



明日秋以霜降日行事 齋戒皇帝散齋二日致齋一日  
 日獻官以省臺官克及各執事官俱散齋二日致齋一日 降  
 香前祀一日清晨有司立仗百官具公服侍班皇帝服  
 皮弁升奉天殿捧香授獻官獻官捧由中陛降中道出  
 至午門外寘龍亭內儀仗鼓吹導引至祭所 陳設前  
 祀一日有司陳設如圖儀 省牲前祀一日獻官公服  
 詣壇東省牲贊禮引至省牲位執事者牽牲省訖詣神  
 厨視鼎鑊視滌濯畢遂烹牲 正祭祭日清晨執事者  
 入實尊罍簋籩豆牲俎并陳毛血豆于神位前列篚  
 幣于酒尊所贊引引獻官及應祀官各入就位 迎神  
 贊禮唱迎神協律郎舉麾奉保和之曲執事者以毛血  
 瘞于坎樂成止贊引唱有司已具請行禮唱鞠躬拜興拜興  
 平身獻官及在位者皆鞠躬拜興拜興平身樂止復位

奠幣贊禮唱奠幣贊引引獻官詣盥洗位搯笏盥手悅  
 手出笏詣五嶽神位前協律郎奏安和之曲贊禮唱跪  
 獻官北向跪搯笏三上香執事者捧幣東向跪授獻官  
 獻官受幣贊禮唱奠幣獻官與奠幣于神位前贊禮唱  
 鞠躬拜興拜興平身次詣五鎮神位前奠幣如上儀訖次詣四海  
 四瀆鍾山江東兩淮兩浙江西湖廣山東山西河南陝  
 西北平福建廣東廣西海南海北左右兩江山川之神  
 并京都外夷山川之神皆以次自左而右逐位上香奠  
 幣皆如五嶽神位前之儀奠訖樂止復位 進俎贊禮唱  
 進俎執事者舉俎升階協律郎跪俛伏舉麾奏之  
 曲贊禮引獻官至五嶽神位前搯笏以俎奠于神位前  
 訖出笏以下二十一  
位進俎皆同初獻贊禮唱行初獻禮贊引引獻官詣  
 爵洗位搯笏滌爵拭爵以爵授執事者以下二十一  
位爵其滌拭授皆同詣酒



尊所司尊者舉冪執爵者以爵進酌醴齊以爵授執事者以下二十一位進爵酌醴授執事皆同出笏贊禮唱引詣五嶽神位前協律郎

舉麾奏中和之曲武功之舞贊禮引至神位前跪搢笏

三上香三祭酒奠爵出笏俛伏興平身少退鞠躬拜興

拜興平身次詣五鎮以下二十一位其上升香祭酒退拜

皆如上儀拜畢樂舞止贊禮唱讀祝獻官跪讀祝官取祝版

于神右跪讀畢樂舞止贊禮唱俛伏興平身稍後鞠躬拜興

拜興平身樂舞止亞獻終獻並如初獻儀惟不讀祝飲福受胙

贊禮唱飲福受胙贊引引獻官詣飲福位鞠躬拜興拜

興平身稍前跪搢笏進爵祭酒飲福酒以爵復于坵奉

俎者進俎獻官受俎以俎授執事者出笏俛伏興平身

鞠躬拜興拜興平身復位徹豆贊禮唱徹豆掌祭官

徹豆贊禮唱賜胙傳贊唱已飲福受胙者不拜在位官

皆再拜鞠躬拜興拜興平身送神贊禮唱送神協律

郎舉麾奏豫和之曲贊禮唱鞠躬拜興拜興平身獻官

以下皆再拜祝人取祝幣人取幣詣望瘞位望瘞贊

禮唱望瘞贊引引獻官詣望瘞位執事者以祝版幣饌

置于坎贊禮唱可燎執事者舉炬火燔至半東西面各

二人以土寘于坎贊禮唱禮畢獻官以下各以次退

諸侯王祭封內山川三代命祀祭不越望故諸侯祭

名山大川之在其地者如魯人祭泰山晉人祭河楚人

祭江漢睢漳是也苟不在其封內者則不敢以祭漢文

帝時名山大川在諸侯封內者其國各自奉祠隋唐宋

元郡不封建故缺其禮國朝封建諸皇太子為王始得

各祭其國內山川一遵周漢故事云祝文洪武三年

月皇帝制曰朕以一身渡江始立太平郡次駐金陵



于今十有六年枝葉茂盛子孫十有一人已命長子為皇太子其餘幼者于今年四月初七日皆封以王爵第二子某建國于秦國內山川之祀王實主之因其年幼未能往祭欲令作詞以奉神其詞必非已出然久不告神朕心甚慊今朕以詞實告遣使賫香幣陳牲醴特伸祭告唯神鑒知尚享

其晉燕趙吳楚潭齊魯靖江九國制文同 秦國則西嶽華山之神及諸山之神西瀆大河之神及諸水之神晉國則中鎮霍山之神及諸山之神汾水之神及諸水之神燕國則北鎮醫無閭山之神及諸山之神易水之神及諸水之神趙國則北嶽恒山之神及諸山之神滹沱河之神及諸水之神吳國則南鎮會稽山之神及諸山之神浙江之神及諸水之神楚國則大別山之神及諸山之神江漢水之神及諸水之神潭國則南嶽衡山之神及

諸山之神洞庭水之神及諸水之神齊國則東嶽泰山之神及諸山之神東海之神及諸水之神魯國則嶧山之神及諸山之神沂水之神及諸水之神靖江則舜山之神及諸山之神濰江之神及諸水之神

王國祭山川壇儀 齋戒前期王散齋二日于別殿王相府官于正寢王致齋一日于正殿王相府官于公廡省牲先祭二日執事設王次于廟壇南門外道之東南向先祭一日典儀典祠導王至次執事者各執事典儀典祠導王至省牲位執事者自東牽牲西行過王前省訖執事牽牲詣神厨典儀典祠導王詣神厨視鼎鑊視滌濯訖典儀典祠導王還次 陳設先祭一日典祠依圖陳設 正祭祭日清晨典祠率執事者各實尊罍盞盞邊豆登鉶寘篚幣于案祝版于諸神位之右大樂



入就位諸執事及陪祭官入就位典祀啓王服遠遊冠  
 絳紗袍典祠典儀導王至位北向立典祠典儀分左右  
 立于王之前 迎神司禮唱迎神大樂作司禮唱請行禮典  
 祠啟有司謹具請行事啟鞠躬拜興拜興平身司禮唱  
 在位官再拜司贊唱鞠躬拜興拜興平身王與在位官  
 皆鞠躬拜興拜興平身大樂止奠幣初獻司禮唱奠幣行  
 初獻禮典祠啟詣盥洗位大樂作典儀典祠導王至盥洗位  
大樂止典祠啟搯圭王搯圭典祠啟盥手司盥洗者酌水王  
 盥手訖司巾者以巾進典祠啟悅手王悅手訖典祠啟  
 出圭王出圭典祠啟詣爵洗位典祠典儀導王至爵洗  
 位典祠啟搯圭王搯圭執爵官以爵進典祠啟受爵王  
 受爵典祠啟滌爵司爵洗者酌水王滌爵訖典祠啟拭  
 爵司巾者以巾進王拭爵典祠啟以爵授執事者王以

爵授執爵官典祠啟出圭王出圭啟詣山川神位前大樂作  
 典祠典儀導王至神位前樂止奉爵奉幣者前行典祠啟  
 跪王跪掌祭詣案取香跪進于王之左典祠啟搯圭王  
 搯圭啟上香上香三上香王三上香訖奉幣者捧幣跪  
 進于王之右王受幣奠于神位前奉爵者捧爵跪進于  
 王之右王受爵典祠啟祭酒祭酒三祭酒奠爵王三祭  
 酒奠爵訖典祠啟出圭王出圭讀祝官取祝跪讀于神  
 位之右讀畢復以祝寘于案典祠啟俛伏興拜興拜興  
 平身王俛伏興大樂作拜興拜興平身樂止典祠啟復位典祠  
 典儀導王復位 亞獻司禮唱行亞獻禮典祠啟行亞  
 獻禮掌祭官于神位前爵內斟酒典祠啟鞠躬拜興拜  
 興平身王鞠躬大樂作拜興拜興平身樂止終獻如亞獻之  
 儀 飲福受胙司禮唱飲福受胙執事舉香案寘于王



拜位前執事酌福酒舉胙肉典祠啟飲福受胙大樂典祠  
 典儀導王至香案前位典祠啟鞠躬拜興拜興平身王  
 鞠躬拜興拜興平身典祠啟跪搢圭王跪搢圭執事捧  
 爵東向跪進于王受爵訖啟飲福酒王祭酒少許飲福  
 酒以爵寘于坫執事官東向跪進胙于王王受胙以胙  
 受左右左右西向跪受興典祠啟出圭王出圭啟俛伏  
 興拜興拜興平身王俛伏興大樂拜興拜興平身樂典祠  
 啟復位典祠典儀導王復位 徹豆司禮唱徹豆掌祭  
 官徹豆司禮唱賜胙典祠啟王飲福受胙者免拜司禮  
 唱陪祭官皆再拜司贊唱鞠躬拜興拜興平身陪祭官  
 皆鞠躬大樂拜興拜興平身樂送神司禮唱送神典祠  
 啟鞠躬拜興拜興平身司禮唱在位官皆再拜司贊唱  
 鞠躬拜興拜興平身王與陪祭官皆鞠躬大樂拜興拜興

平身樂

望燎司禮唱望燎讀祝官取祝捧幣者取幣

掌祭官取饌詣燎所典祠啟詣望燎位大樂

典祠典儀導

王至望燎位樂

候燎半司禮唱可燎典祠啟禮畢導引

王還次引禮引陪祭官出

各府州縣祭山川

於王國既已祭其封內山川而郡

縣亦得于本境築壇致祭凡各府州縣山川壇皆築于

城西南高三尺四出陛三級方二丈五尺祭則設主于

其上以春秋清明霜降日行事牲用羊一豕一豕一豕二實

以粟黃牛脯豆二實以葵菹鹿醢簋一實以黍飯簋一

實以稷飯象尊一實以緹齊壺尊一實以事酒

各府州縣祭山川壇儀

時日春用清明日秋用霜降

日行事

齋戒前三日三獻官

守令為初獻僚屬以次為亞終獻

散齋二日

于別寢致齋一日于祭所散齋理事如舊惟不弔喪問



疾不作樂不判署刑殺文書不行刑罰不預穢惡事致齋惟祭事得行其餘悉斷執事人員齋各一日於祭所陳設前祭二日有司掃除壇內外設三獻官執事官次于壇壝門外為瘞坎于門外之西北方深取足容物前一日執事設省牲位于南門之外設山川神位于壇上之北正中南向每位設籩四于神位之左豆四于神位之右簠簋各一于籩豆之間毛血豆于簠簋之前俎二又于毛血之前香燭案于俎前爵坫沙池于香案之前祝版于神位之右設酒尊位于壇上東南隅犧尊一山壘一次之設幣篚位附于酒尊所設爵洗位于壇下之東盥洗位于爵洗之東初獻官位于壇下之正中北向亞獻官位于初獻位之左終獻官位于初獻位之右掌祭官二人位于神位之左右司尊司爵司洗捧幣位

各于其所設望瘞于壇之西南 省牲前祭一日執事者引三獻官至省牲位北向立執事者自門東牽牲西行過獻官前省訖執事者牽詣神厨遂烹牲執事以豆取毛血寘饌所 正祭奠幣祭日丑前五刻行事執事者入實尊壘籩豆簠簋登劔陳毛血豆祝版執事者各服垂角唐巾盤領衫各就位引贊引獻官各服公服入就位贊引唱有司已具請行事贊禮唱鞠躬拜興拜興平身在位皆再拜贊者唱奠幣引贊引初獻官詣盥洗位引贊唱搯笏初獻官搯笏唱盥手司盥洗者酌水盥訖唱帨手司巾者以巾進帨訖唱出笏初獻官出笏引詣山川神位前北向立唱跪搯笏初獻官跪搯笏執事者以幣跪進于初獻之右初獻官受幣奠于神位前訖稍後贊引唱俛伏興拜興平身初獻官俛伏興拜



與拜興平身引復位 初獻贊禮唱行初獻禮引贊引  
 初獻詣爵洗位引贊唱搯笏初獻官搯笏執爵者以爵  
 進初獻受爵司爵洗者酌水初獻滌爵拭爵以爵授執  
 事者引贊唱出笏初獻出笏引詣酒尊所引贊唱搯笏  
 初獻官搯笏訖執事者以爵授初獻初獻執爵司尊者  
 舉冪酌犧尊之緹齊以爵授執事者引贊唱出笏初獻  
 官出笏引詣山川神位前北向立引贊唱搯笏跪初獻  
 搯笏跪掌祭官捧香跪進于初獻之左引贊唱上香上  
 香三上香初獻三上香訖執事者以爵跪進于初獻之  
 右初獻受爵引贊唱祭酒三祭酒奠爵初獻三祭酒奠  
 爵訖贊引唱出笏讀祝官取祝跪于神位之右讀訖引  
 贊唱俛伏與拜興平身初獻再拜訖引復位 亞  
 獻終獻並如初獻之儀 惟酌山壘之事酒與不讀祝與初獻不同 飲福贊禮唱

飲福贊禮引初獻官詣飲福位西向立掌祭者以爵酌  
 福酒持詣獻官之左引贊唱鞠躬拜興平身初獻  
 官再拜訖引贊唱跪搯笏初獻跪搯笏掌祭舉福酒爵  
 進于初獻之左初獻受爵祭酒少許飲福酒奠爵掌祭  
 者減神位前胙肉跪進于初獻之左初獻受胙以胙授  
 執事者引贊者唱出笏俛伏與拜興平身初獻再  
 拜訖引復位贊禮唱賜胙初獻官飲福受胙免拜在位  
 者皆再拜唱鞠躬拜興平身亞獻官以下皆鞠躬  
 拜興平身 望瘞贊禮唱詣望瘞位引贊引初獻  
 官以下詣望瘞位北向立祝人取祝幣人取幣掌祭取  
 饌寘于坎贊引唱可瘞寘土半坎贊引唱禮畢引初獻  
 官以下及諸從祭官以次而出

圖書集成洪武七年令禮部頒祭嶽鎮海瀆儀于所在



有司

明會典嶽鎮海瀆東嶽泰山山東泰安州祭西嶽華山  
 陝西華陰縣祭中嶽嵩山河南南府祭南嶽衡山湖  
 廣衡州府祭北嶽恒山直隸真定府祭東鎮沂山山東  
 青州府祭西鎮吳山陝西隴州祭中鎮霍山山西平陽  
 府祭南鎮會稽山浙江紹興府祭北鎮醫無閭山遼東  
 祭東海山東萊州府祭西海山西蒲州祭南海廣東廣  
 州府祭北海河南懷慶府祭江瀆四川成都府祭河瀆  
 山西蒲州祭淮瀆河南南陽府祭濟瀆河南懷慶府祭  
 王圻續通考七年令祭山川諸神於春秋仲月上旬擇  
 日後又以孟春郊祀時諸神既預祭壇內乃定以仲秋  
 祭社稷後擇日祭之

明史禮志洪武九年復定山川壇制凡十三壇正殿太

歲風雲雷雨五嶽五鎮四海四瀆鍾山七壇東西廡各  
 三壇東京畿山川夏冬二季月將西春秋二季月將京  
 都城隍十年定正殿七壇帝親行禮東西廡遣功臣分  
 獻

王圻續通考十年太祖親祀山川壇諸神于殿中功臣  
 分祀兩廡命官十八人分祀嶽鎮海瀆賜之制

明會典十四年令在外山川等神以文職長官一員行  
 禮武官不預如軍民指揮使司則從本司行之

二十一年各設壇于大祀殿以孟春從祀山川壇惟仲  
 秋一祭

明史禮志洪武二十一年增修大祀殿諸神壇壝乃敕  
 十三壇諸神並停春祭每歲八月中旬擇日祭之命禮  
 部更定祭山川壇儀與社稷同



大政紀永樂五年三月甲子督木工部尚書宋禮奏有大木數株不藉人力一夕出大谷達于江蓋川之靈相之賜其山名神木山遣禮部郎中王羽致祭建祠立碑命侍讀胡廣撰碑文

明會典永樂六年駕幸北京東宮監國凡山川之神預期勅皇太子攝祭

大政紀永樂八年二月己酉車駕次龍虎臺遣行在太常寺少卿朱焯祭居庸山

明會典永樂中建山川壇位置陳設悉如南京舊制唯正殿鍾山之右增祀天壽山神帛用黑色加爵篚各一春明夢餘錄山川壇在正陽門南之右永樂十八年建繚以垣墻周圍六里

明會典孝宗弘治元年令湖廣太嶽太和山祀神油燭

香炷布政司照例每三年一次于夏稅內酌量派收陸續送山應支

王圻續通考世宗嘉靖初科臣陳棐題請正嶽祀略曰真定府曲陽縣有北嶽恒山廟為朝廷秩祀之所及查其實恒山在迤北渾源州南北相去甚遠俗傳曾有飛石一方自恒山坎中飛來墜于曲陽故立廟祀今其廟扁有飛石殿臣竊疑之臣考舜典十有一月巡狩至于北嶽周禮載恒山為并州之鎮水經謂北嶽為元嶽天文志大梁析木以負北海其神主恒山三代而下歷漢隋唐俱于此致祭石晉失燕雲十六州之地宋未能混一北為契丹所據無緣至幽薊之域而睹所謂北嶽者所以止得祭之于曲陽詭言飛石之謬以粉飾其削弱之迹耳然宋都汴而真定



在汴京之北以為北門不得已權宜祭之猶之可也  
 我太祖高皇帝統一華夏奄有萬方首定嶽鎮海瀆  
 之號但時都金陵真定迴在京師之北所以因循未  
 曾釐正我成祖文皇帝建都北平而真定已在京師  
 之南使當時有禮官建明顧有南面而登踵宋人削  
 弱之迹哉臣因此而論及五嶽焉臣觀祀典載嵩山  
 中嶽在河南登封縣泰山東嶽在山東泰安州衡山  
 南嶽在湖廣衡山縣華山西嶽在陝西華陰縣祠祀  
 皆近在本山之麓而恒山北嶽則即此大同府東南  
 渾源州者是也今不唯北嶽之祀缺謬而東嶽行祠  
 徧天下尤為惑妄乞將渾源州北嶽恒山定為秩祀  
 之所其廟制量加修拓以後凡遺告祈請皆詣此致  
 祭其曲陽祠廟但令有司致祭飛石殿扁并令改撤

于凡東嶽行祠除京師及齊魯之境外其餘量改書  
 院社學仍不許加修新建以昭皇上釐正典禮之盛  
 則治道幸甚

明會典嘉靖八年令凡親祀山川等神皆用皮弁服行  
 禮以別于郊廟先是改山川為中祀嘉靖中凡山川皆  
 天子親祀國有大事則遣官祭告

十年建天地神祇壇于先農壇之南天神在左南向地  
 祇在右北向附祖陵基運山皇陵翊聖山顯陵純德山  
 神于地祇壇并號鍾山曰神烈山

神祇壇國初建山川壇于天地壇之西永樂中北京山  
 川壇成嘉靖十一年即其地為天神地祇壇神壇方廣  
 五丈高四尺五寸五分四出陛各九級壇墻方二十四  
 丈高五尺五寸厚二尺五寸櫺星門六正南三東西北



各一內設雲形青白石龕四于壇北各高九尺二寸五分祇壇面闊十丈進深六丈高四尺四出陛各六級壇墻方二十四丈高五尺五寸厚二尺四寸櫺星門亦如神壇內設青白石龕山形三水形二于壇北先擬設于壇南北向後改各高八尺二寸左從位山水形各一于壇東右從位山水形各一于壇西各高七尺六寸又令神祇壇三年一親祭

嘉靖十一年改山川壇名為天地神祇壇改序雲師雨師風伯雷師天神壇在左南向雲雨風雷凡四壇地祇壇在右北向五嶽五鎮基運翊聖神烈天壽純德五陵山四海四瀆凡五壇從祀京畿山川西向天下山川東向以辰戌丑未年仲秋皇帝親祭餘年遣大臣攝祭其太歲月將旗燻城隍別祀之十七年加上皇天上帝尊

稱預告于神祇遂設壇于園丘外壇東南親定神祇壇位陳設儀式禮部言皇上親獻大明壇則四壇分獻諸臣不敢並列請先上香畢命官代獻帝裁定上香奠帛獻爵復位後分獻官方行禮亞終二獻執事官代餘壇俱獻官三行

明會典嘉靖十八年南巡經過處所真定望祭北嶽恒山之神用牛犢羊豕上具常服行禮如常儀五府九卿巡撫大臣吉服陪拜衛輝遣官祭濟瀆之神用太牢鈞州望祭中嶽嵩山之神用牲犢俱翰林院撰祭文禮如北嶽南陽遣官祭五當山之神用牲犢俱翰林院撰祭文

明史隆慶元年禮臣言天神地祇已從祀南北郊其仲秋神祇之祭不宜復舉令罷之



王圻續通考隆慶二年六月以陝西地震命撫臣張祉告祭西嶽華山西鎮吳山之神

三年三月遣太常寺官祭東嶽泰山之神以洪水為患命總督河道都御史翁大立祭大河大濟之神巡撫鳳陽等處侍郎趙孔昭祭大江大淮之神巡撫山東都御史姜廷頤祭東嶽泰山東鎮沂山之神巡撫都御史谷中虛祭東海南鎮會稽之神巡撫保定都御史朱大器祭北嶽恒山之神

明史萬歷十四年巡撫胡來貢請改祀北嶽于渾源州禮臣言大明集禮載漢唐宋北嶽之祭皆在定州曲陽縣與史俱合渾源之稱北嶽止見州誌碑文經傳無可考仍祀曲陽是

春明夢餘錄北嶽在今真定府定州曲陽縣漢為常

山郡上曲陽縣史記封禪書常山王有罪遷天子封其地於真定以續先王祀而以常山為郡然後五嶽皆在天子之邦漢書郊祀志祠北嶽常山于上曲陽後漢書章帝紀元和三年幸中山遣使者祠北嶽于上曲陽魏書和平元年如中山過恒嶽禮其神而返二年如中山遣使者禮恒嶽隋書大業四年帝巡河北親祀恒嶽唐書地理志定州曲陽縣元和十五年更恒嶽曰鎮嶽有嶽祠張嘉徵傳為州刺史至州于恒嶽廟中立頌自為文書于石其碑用白石為之素質黑文甚為奇麗先是嶽祠為遠近祈賽有錢數百萬嘉徵自以為頌文之功納其數萬自漢及唐北嶽之祭皆在曲陽一統志乃謂恒山在渾源州南二十里山西志又謂宋時因山川諸州陷于契丹乃即曲



陽致祭此謬說也

大學衍義補邱氏濬曰中國之地在三代不出九州之外惟揚徐青冀四州濱海而已四海惟東北濱中國而南海北海則越在荒服之外自漢以後南越始入中國而有南海然西海竟不知所在故今祀東海于登州祀南海于廣州二祀皆臨海而祭西海則望祀于蒲州北海則望祀于懷慶夫宋都汴梁而懷慶在其北是時失幽燕而以白溝河爲界無緣至遼薊之域出國門而北望以祭之可也國初都金陵因之以祭亦不爲過若今日建都于燕往南而祭北海豈天子宅中以臨四海之義哉且古謂青州爲北海郡青去登不遠猶以是名今京師東北乃古碣石淪海之處于此立祠就海而祭于勢爲順于理爲宜況今

北鎮醫巫閭山在于遼海山既可以爲北鎮川獨不可以爲北海乎若夫中國之正西在于秦隴西南則蜀稍南則滇也滇之極西百夷之外聞有大海通西南島夷此地在前代未入中國今既爲羈縻之地則王化之所及也宜于雲南望祀之如此則四海之祀皆在吾域中矣議禮之事非臣下所敢專者謹錄愚見以俟採擇焉

又曰臣案所謂四望者蓋以五嶽四鎮四瀆乃天下山川之大者天子兼有天下之大不能親臨其地故遙望而祭之也若夫所謂山川者隨所在而有則各隨其地而祭之焉本朝郊壇之外既各爲壇以分祭五嶽四鎮四瀆四海又於郊壇之右以專祀之初春大祀則從享于天地仲秋報祀天子乃躬獻于其壇



焉是則所謂四望之祭也又列南京鍾山之神北京  
 天壽山之神與之同壇而祭所謂山川之祭也又于  
 凡天下藩府郡縣既立山川壇總祭其一方之山川  
 又表其山林川澤之有名者以專祀之使有司躬蒞  
 其所在祀焉

右明祀山川

五禮通考卷第四十八



